CBETA電子佛典集成

CBETA Chinese Electronic Tripitaka Collection ebook

X78n1550

淨土聖賢錄續編

清 胡珽述

目次

- 編輯說明
- 章節目次
 - 。 淨土聖賢錄續編發凡
 - 。 淨土聖賢錄續編偈
 - 。 淨十聖腎錄續編日次
 - 。 往生比邱第一
 - 性修
 - <u>行修</u>
 - 忍生
 - 仁符
 - 實[王*永]
 - ■常智
 - 絡絲僧
 - 廣志
 - 道證

 - 撤洣
 - 岩字
 - 邁春
 - 律淨
 - 慧明
 - 黑明
 - ______
 - 際醒
 - 起信
 - 真傳
 - 達純
 - 震徹
 - 道守
 - 列權
 - **■** 佛度
 - 雤源
 - □ ///ボ
 - 正直東瓜和尚
 - 定基

- 悟靈
- ■圓融
- 悟開
- 方海
- 昌茂
- 。 往生比邱尼第二
 - 湖上老尼
 - 本印
 - 遂欽
 - 律宗
 - 佛琦
 - 蓮芳
 - ■朗然
 - 妙成
 - 道乾
 - 蘭若庵尼
 - 道悟
- 。 往生王臣第三
 - 張師誠
 - 音攀桂
- 。 往生居十第四之一
 - 黄武城
 - 吳如庵
 - 愈有光
 - 蘇起鳳
 - 惲又騑
 - 王貞生
 - 蔡鵬力
 - ■唐温和
 - 陳君魁
 - ▶ 陸十鈴
 - 馬榮祖
 - 彭希涑
 - ■彭紹升
 - 呂蔚若
 - 曾庚
 - ■陸西橋
 - <u>凌樹</u>

- 沈暢
- 蔣龜蒙
- 曹聖友
- 馮庭桂
- 浦文榮
- 鄭兆榮
- 吳濂
- 沈廷瑜
- 施靜巖
- 張孝林
- **方**圖
- 潘萬宗
- 沈舒華
- 沈虞尊
- ■馬敬修
- 許仁孰
- 。 往生居十第四之二
 - 裴永度
 - 鍾九思
 - ■周光
 - 路坤
 - 吳允升
 - 范元禮
 - 孫復元
 - ■張清新
 - 丁繁桂
 - 李勤
 - 張惇五
 - ■曹諧和
 - 潘遵懋
 - 宋萊
 - 周慶孫
 - 陳居士
 - 余邦賢
 - 吳宗魏
 - 張齒延
 - 金庭棟
 - 徐僖

- 錢萬鎰
- 華漢槎
- 方步瀛
- 朱麟書
- ■陳鍠
- ■郭觀光
- 。 往生雜流第五
 - 吳生
 - 沈承先
 - 周絢堂
 - 姚牛
 - 宋寶官
 - 陳德心
 - ■東門匃
 - 癡頭道士
 - 周耀發
 - 瞿晉槐
 - 孫松亭
 - 陳書叟
 - 丁童子
- 。 往生女人第六
 - 田婆
 - 蔣氏
 - ■賀氏
 - 黄氏女
 - 王荊石女
 - 陸氏
 - ★氏
 - 兵家婦
 - 曹媼
 - 陶氏
 - 注氏
 - ■費孺人
 - 許節婦
 - 宋孺人
 - ■鄭氏
 - 百不管老媼
 - ■陸氏

- 吳氏
- 沈媼
- 姚氏
- **■** 汪氏
- 王氏
- 吳媼
- **■** 倪嫗
- 潘氏
- 汝氏
- **王氏**
- 潘氏
- 朱氏
- ◆ 朱氏
- 羅氏
- 王氏女
- ■邵媼
- 張家婦
- 俞媼
- 吳婆
- 錢孺人
- 沈婆
- ■陸安人
- 。 往生物類第七
 - 雞
- 。No. _1550-1 <u>種蓮集</u>
 - 序
 - 善隆
 - 達禮
 - 王君榮
 - 唐景垣
 - 沈載元
 - 王際良
 - 夏耀文
 - 曹居士
 - 邵媼
 - **■** 張氏
 - 工氏

- 高十楨
- 丁世濟
- ■陸孺人
- 邱逢泰
- 錢氏
- 錢文彬
- 錢文燦
- 定意
- ■明舟
- 汪善慶
- 靜波
- 易特墨太夫人
- 余恒行
- 玉峯法師
- 願登師
- 謝春華
- 巻目次
 - o 1.
 - o 2
 - o 3.
 - o <u>4</u>,
- 贊助資訊

編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Uni code 3.0 為基礎,不在此範圍的字則採用<u>組</u>字式表達。
- 梵文悉曇字及蘭札字均採用羅馬轉寫字, 如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta.org 回報。
- <u>版權所有</u>,歡迎自由流通,但禁止營利使用。

淨土聖賢錄續編發凡

- 是錄體例。悉準前錄。如出家二眾書一名。在家者書二名。唯二 林居士除本傳外。凡所引證。概以字稱。尊所主也。以前錄係居 士所定故。
- 前錄首標教主。次闡教聖眾。係探本窮源之意。茲則既稱續編。 首二層可以不贅而有明。以前諸書。前錄引用略備。故茲之分門 別類。以比邱居先。紀月編年。以 國初為始。但敘事之前後。 不論品之高低。唯是所採有限。挂漏必多。願諸君子惠我遺珠。 俟編三錄。
- 染香集諸書。凡臨終正念者。輒從登記。夫往生瑞應。雖或隱或顯。未可一定。然必徵諸素行。如其願力未深。功夫未熟。直待臨終念佛。難保決定。回心錄中。如王貞生施靜巖輩。雖亦十念之誠實有百倍之勇。必如是者。生西可、。否則名實不符。恐有魚目混珠之慮。因略加芟汰。以歸一致。
- 近來載往生者。每經引用。遞有增加。二林居士深痛其習。故前錄中。每一傳後。皆注原書。以作證明。茲仍其體例。但稍易其 個鄙之句。間有近今。故事必出自不妄語人之口。復向故老。咨 訪再三。始敢筆之於書。其或淨行可傳。而臨終無正念者。概弗 濫登。
- 雲棲往生集。傳後間有贊詞。晰其隱義。而前錄但有總論贊詞。 概從簡略。茲則有義不明者。亦用贊詞發之。非敢妄生知見也。 聊以導初機云爾。

淨土聖賢錄續編偈

淨業弟子 胡珽 述

我觀真性海 妙湛本不動 世出世間法 無一不具足 上齊一切佛 下同含識類 平等絕思議 直俗皆無礙 離諸分別相 理事悉圓融 剎那不覺了 担目忽生華 無明為繋縛 障蔽智慧日 故於一相中 妄起淨穢見 忘本唯逐物 念念入輪回 由是顛倒心 沈淪難脫離 隨業而流轉 皆是一心生 聖凡從此隔 豈知十方剎 大覺如虐空 世界如浮雲 聚散本無迹 空生而空滅 但隨心淨垢 剎剎各差別 眾苦所逼惱 業濁現五濁 心淨感淨土 七寶為莊嚴 **迷人**但執境 東西白不同 還受夢苦樂 覺知夢非真 譬如夢幻者 苦樂自然滅 我佛大慈悲 示此異方便 一句阿彌陀 能截生死流 不出娑婆界 穩坐紫金蓮 彌陀及心土 非一亦非二 若能如是解 決定入無生 我今輯斯錄 普勸諸有情 願見者聞者 悉發菩提心 回向無上覺 仰祈三寶力 修諸福善業 令我及眾生 冥薰而加護 同牛極樂國

淨土聖賢錄續編目次

- 卷一
 - 。往生比邱第一
 - 性修
 - 行修
 - 忍生
 - 仁筏
 - 實[王*永]
 - 常智
 - 絡絲僧
 - ■廣志
 - 道證(梅松)
 - ←

 →
 - 徹迷
 - 嵩安
 - 邁春
 - 律淨
 - ■慧明
 - 一滩
 - 際醒
 - 起信
 - 真傳
 - 達純
 - 靈徹
 - 道守

- ■列權
- 佛度(絕相)
- 覺源
- 正真
- 東瓜和尚
- 定基
- 悟靈
- ■圓融
- 悟開
- 方海
- 昌茂
- 。往生比邱尼第二
 - ■湖上老尼
 - ■本印
 - 遂欽
 - 律宗
 - ■佛琦
 - 蓮芳
 - 朗然
 - 妙成
 - 道乾
 - 蘭若庵尼
 - 道悟
- 卷二
 - 。往生王臣第三
 - 張師誠
 - 章攀桂
 - 。往生居士第四之一
 - 黄武城
 - 吳如庵
 - 俞有光
 - 蘇起鳳(吳敬山)
 - 惲又騑
 - 王貞生
 - 蔡鵬九
 - 唐漚和
 - 陳君魁
 - 陸士銓

- ■馬榮祖
- 彭希涑(顧氏)
- 彭紹升
- 呂蔚若
- ■曾庚
- 陸西橋
- 凌樹
- 沈暢(顧居士)
- 蔣龜蒙
- 曹聖友
- 馮庭桂
- 浦文榮
- 鄭兆榮
- 吳濂
- 沈廷瑜
- 施靜巖
- 張孝林(驥鍾)
- ■方剛
- 潘萬宗
- 沈舒華
- 沈虞尊
- 馬敬修
- 許仁熟
- 卷三
 - 。往生居士第四之二
 - 裴永度
 - 鍾九思
 - ■周光
 - ■路坤
 - 吳允升
 - 范元禮
 - 孫復元
 - 張清新
 - 丁繁桂
 - 李勤(杏姑)
 - 張惇五
 - 曹諧和
 - 潘遵懋

- 宋萊
- 周慶孫
- 陳居士
- 余邦賢
- 吳宗魏
- 張齒延
- 金庭棟
- 徐僖(嚴氏)
- 錢萬鎰
- 華漢槎
- 方步瀛
- 朱麟書
- 陳鍠(薛紹基)
- ■郭觀光
- 。往生雜流第五
 - 吳生
 - 沈承先
 - 周絢堂
 - 姚生
 - 宋寶官
 - 陳德心
 - 東門匃者
 - 凝頭道士
 - 周耀發
 - 瞿晉槐
 - 孫松亭
 - 陳畫叟
 - 丁童子
- 卷四
 - 。往生女人第六
 - 田婆
 - 蔣氏
 - 黄氏女
 - 王荊石女
 - 陸氏
 - 徐氏
 - 兵家婦
 - 曹媼(許氏母)

- ■陶氏
- 汪氏
- 費孺人
- 許節婦
- 宋孺人
- 鄭氏
- 百不管老媼
- 陸氏
- 吳氏
- 沈媼
- 姚氏
- 汪氏
- 王氏
- 吳媼
- 倪嫗
- 潘氏
- 汝氏
- 祁氏
- 王氏(張氏 陳氏)
- 潘氏
- 朱氏
- 朱氏
- 羅氏
- 王氏女
- ■邵媼
- 張家婦
- 俞媼
- 吳婆
- 錢孺人
- 沈婆
- 陸安人
- 。往生物類第七
 - 難(蛇 貓 猴 雀 豬)
- 。種蓮集第八
 - 善隆
 - 達禪
 - 王君榮
 - 唐景垣

- 沈載元
- 王際良
- 夏耀文
- 曹居士
- ■邵媼
- 張氏
- 丁氏
- 高士横
- 丁世濟
- 陸孺人
- 邱逢泰
- 錢氏
- 錢文彬
- 錢文燦

淨土聖賢錄續編目次(終) No. 1550 淨十聖腎錄續編券一

往生比邱第一

性修

性修。不詳其所出。 大清順治中。住常德府圓照庵。布衣蔬食。 日課彌陀萬聲。寒暑不閒。遇歉年。將所有錢米布帛。盡施飢寒孤苦之人。徒眾交責。修唯含淚念佛而已。年七十。一月前。自知時至。屆期。含笑坐逝。天樂迎空。聞於遠近。室內異香。經月不散(身世金丹)西史氏曰。不惜布施。則貪業盡。含淚念佛。則瞋業盡。自奉儉約。則癡業盡。三業盡。而往生品位必高。異香天樂。非其梵行芬芳。心聲嘹亮之所致乎。

行修

行修。姓陳。泰州沙村人。業農。不識一丁。無以自活。一日赴水求死。有白衣人救之出。年三十一。出家為僧。冬夏一衲。苦行數年。朝普陀山。中道路絕。遇老人引至家止宿。迨天明。見荒墟而已。歸後。龕坐南關外荒冢中。嘗五七日不食。參向上事。一日夜深有擊龕者。曰。若可受法。修隔龕見橋下有大船。燈火鼓吹過。

遂大悟。後移住覺印寺。精修淨業者六年。康熙四年春。謂人曰。明年六月二日。吾行矣。次年初夏。皆來問訊。州主恐其惑眾。遣兵守之。曰。至期不驗。必置諸法。六月朔猶無恙。人為危慄。明日晨起。書偈曰。慧日中天照大千。晝行禮拜夜參禪。眉間斜挂吹毛劍。地獄天堂任我前。遂端坐龕中。命人舁至一橋。曰。不可。此地人皆畜形也。舁至東壩橋。曰。為我南向。手一魚念佛。輕煙一縷。起自鼻端。須臾火熾。魚聲佛聲。琅琅達雲表。忽聞龕內訇然。龕頂飛墮百步。火餘。遺一物。狀如蓮華。堅白不碎(揚州府志蓮藏○揚州府志載修十一月朔圓寂與蓮藏互異)西史氏曰。出火焚身。非扭捏裝飾之謂也。著魔辦道者審之。

忍生

忍生。姓李。山西平陽府。世家子也。自幼厭俗。年四十四。出家參禪。深有悟入。崇念佛法門。行脚至泰州。遇下河楊居士。建庵供養。即閉關清修淨業。化導各莊善信。後因下河被水。又至本州勸化。家家念佛。康熙八年正月初。預知時至。偏辭檀越。十九日。沐浴更衣。屬大眾念佛緊要。遂趺坐逝。異香滿室中。至二十六日。舉龕野外。出火自焚(蓮藏)。

仁筏

仁筏。姓裴。常州北郭人。父母早逝。家業彫零。為人傭作。年三十餘。聞淨土法門。遂發心出家。募刊淨土經書。廣施四眾。後受華山具足戒。習禪定。每夜必坐香數炷。康熙十九年七月。忽示疾。二十一日。訣別諸友。次夕五鼓。謂其徒曰。吾行矣。乃整衣趺坐。有僧在旁。馱誦佛號。筏曰。佛須朗念。乃高稱佛號。一聲而化(蓮藏)。

實[王*永]

實[王*永]。字珍輝。姓陳。鳳陽府霍邱縣人。誕生時。祥光燭鄰。異香滿室。幼有奇相。膚不受垢。性慈恕。喜聞僧誦經。塾師授學。過目如流。師甚愛之。謂其父母曰。此子實非塵俗之流。乃佛門法器。勿相錯誤也。父母許之。遂送本邑大悲庵。從心開和尚。祝髮旋受具戒。研究華嚴涅槃諸大部。宛如宿習者。後移住龍潭下院。一意修持淨業。歷三十年如一日。康熙六十一年春。示微疾。自知緣盡。屬付院事畢。唯注念淨域。至三月四日早。命具湯

洗浴。集眾同稱佛號數百聲。奄然而化。闍維時。火光如五色雲 霞。散布四山。世壽四十八。僧臘三十一(南山宗統)。

常智

常智。字聞慧。淮安沐陽人。幼喜禮觀音大士。既長披緇。投聞思寺稟具。一日隨眾課誦。至心經之無罣礙句。胸中凝結。一時渙然。遂渡江。徧遊名剎。參諸知識。久之無所契。歸而專修淨業。精嚴戒行。凡人有過。必循循化誘。有不遜者。亦必委婉遣之。終無慍色。又與諸同志。結社修懺。數月前。即知寂期。告諸同社。至期集眾禮佛。命湯沐浴。跏趺而逝。闍維。有紫色蓮華。大如斗。自火光中湧出。上有重光。影影如智狀。久之方散。人皆見之(南山宗統)西史氏曰。明師無逾彌陀。善友誰如補處。昔人嘗言之矣。顧後世沙門。輕視淨土。往往指為著相菩提。藉非宿具慧眼。洞明大道者。鮮不為其所搖惑。聞慧徧參不契。其庶幾乎。

絡絲僧

絡絲僧。不知何許人也。住杭城之東園。俗以絡絲為業。棄而出家。故名。獨居破庵。晝夜念佛不輟。顧無以自活。謂其舊主曰。但飯我。仍為主絡絲可乎。主從之。既得食。則手軋軋。口喃喃。他無所事矣。如是數年。一日攜零紙滿筐。向西泠居士。吳樹虗欲易百錢。詰其故。僧徐答曰。老居士前不敢隱。我今日西歸。擬市柴一擔耳。樹虗曰。果爾。余供師柴。僧合掌謝。擔柴歸。並期某時一臨。為作證明。樹虗至時往。則僧已積柴為座。趺坐其上。四面火然。僧於火中。舉手作別。忽以手抹面一過。頓現黃金色。頃刻化盡。樹虗喟然歎曰。古德奇縱。再見於今日矣(染香集)西史氏曰。疊薪自燼。與行修之鼻端出火。類而不類。雖然安知其所焚者。非三昧火乎。

廣志

廣志。字爾立。會稽人。出家後。結茅天台黃金洞。專修淨業。蘇 州殷天成。詣天台飯僧。服其道行。延住吳山接引庵。垂三十餘 年。隨機化導。指歸淨土。從受戒者。累百人。嘗結期念佛。晝夜 不絕聲。其弟子造之。見志經行之地。大書阿彌陀佛。放金色光。 訝之以問志。志曰。汝自本光發現耳。乾隆二十六年。四月望。要 弟子四人。詣庵供佛。臨別謂曰。明日午前。當來送我。及期。眾至焚香。誦佛千聲。端坐而逝(西方公據集驗)。

道證

道證。杭州人。住郡東大椿禪院。性誠實。專修淨土。每日三時。 炷香為度。長跪佛前。虔持名號。年八十。一日謂眾曰。來年二月 十二日。我西歸矣。及期無恙。或戲之曰。今日是二月十二矣。師 何不西歸。證驚曰。今果華朝耶。即沐浴焚香。集眾而化。 有僧梅松者。與證同修淨土。住妙嚴寺。其夜夢中。有人告曰。道 證師坐化。爾何不一送耶。梅松覺而趨視之。撫其背曰。平日相 知。臨去何無消息。雖然。我亦不久於世矣。歸三日。亦坐化。事 在乾隆三十年(染香集)西史氏曰。至期而忘西歸。臨去而無消息。葢 無心於生死也。梅松隨步後塵。豈非有宿願而然哉。

千一

千一。字遠人。姓王。海甯人。住西湖昭慶寺。謹持戒律。精勤念佛。志樂寂靜。顏其居曰。廬山僻處。潛修其中。乾隆四十三年秋。法侶過訪。一謂曰。公來恰好。正我西歸。可作證明也。說偈坐化。塔於院左(染香集)。

徹迷

徹迷。姓鍾。嘉興人。為人撲實。中年投海甯護國院。定高和尚薙染。一心淨業。後移住延恩寺。出入持珠。默觀。餘無所長。人多忽之。一日謂寮眾曰。我將辭別諸公。眾問何往。曰。往西方。眾共笑之。後數日。從外歸。又謂曰。今日決意去矣。頃之。更衣趺坐。大聲云。我去也。遂寂然。眾呼之逝矣。時在乾隆五十六年(染香集)。

嵩安

嵩安。不詳其所出。住舒邑白衣庵。性椎魯。秉戒於慈濟履實和尚。信根宿具。荎村道人。教誦法華經。頗有悟入。後銳志念佛。 晝夜不輟。晚年得腹鼓疾。自知定業。恬不介意。念佛如常時。疾 垂革。徒眾往視。安止之。乃屈指曰。當於某日來候。及期。沐浴 更衣。誡徒輩勿哭泣。須高聲念佛。助我往生。頃之。怡然而逝(蓮宗集要)。

邁春

邁春。姓問。桐縣人。幼讀書聰慧。好內典。年十九。遊靈隱寺。登法堂。見心空及第額有省。出家天竺延壽堂。徧參名山。入福嚴室。樹蓮和尚。知為法器。一日問曰。煩惱起時。將何止息。春曰。本性湛然。有何煩惱。蓮深契之。遂付大法。春雖得法禪宗。而崇尚淨業。既住雲峰寺。率眾念佛。剋二十一日為期。周而復始。數年不懈。既復結期百日。晝夜持念。不展牀褥。嘉慶十二年冬。沐浴端坐。謂眾曰。頃見鸚鵡念佛法僧。其音微妙。殊可樂也。合掌而終(染香集)。

律淨

律淨。字明徹。姓錢。湖州德清人。年四十。出家抗之慈聖庵。嗣往東園德寧庵。以誦法華經為日課。二十年不閒。一日法侶戒乘。語之曰。汝道心如此堅固。若加以念佛回向。更佳矣。如智者大師得法華三昧。尚求往生淨土。汝何不然。因出十疑論示之。淨瞿然有省。自是誦經畢。即念佛回向。又年餘。嘉慶十一年七月。告其徒增秀曰。吾中秋前。當往西方。八月二日。復謂曰。初七日卯時行矣。問何以知之。淨笑曰。水到渠成。及期往視。已新衣趺坐。時鄰僧多來念佛相助。淨止之曰。用功全在平日。臨渴掘井何為。乃移坐龕中。說偈云。吾年六十九。真實不虗口。放下者雙手。直往西方走。合掌而寂(染香集)西史氏曰。前仁筏。繼嵩安。皆令高聲唱佛。明乎助緣緊要矣。而茲謂臨渴掘井者。正其功臻純熟。勉人精進耳。三昧未成者。勿以是藉口。

慧明

慧明。甯波鄞縣人。住杭州報國寺。性質直。唯知念佛。每執持洪名。聲若潮沸。香盡不知也。得施即放生。隨放隨稱佛名。必回向西方。見人不作寒暄語。但云。死到哉。快些念佛。越中緇白知其名者。每居病危。即延之念佛。助往生緣。或叩其所謂。曰。憶昔患熱病日甚。幾不能支。幸意根中佛號。一句頂一句而出。連縣不已。病魔消却。竟仗此而痊。自此以後。無論語默動靜。皆有一佛號。從意根中一句頂一句而出也。嘉慶十二年。頸後患疽。絕不呻

吟。臨終色和悅。手作捻珠狀。念佛移時而逝。先是杭城某。夢所識已故黃和尚語曰。我勸汝歸依慧明師。汝因循不果。今明師月內欲西歸。再遲無及矣。汝當速往求之。汝法名大通。已與汝定。醒而異之。天明起詣寺。明已疽發甚劇。急邀同伴五人。求歸依。明許之。及授法名。明手書五字。作鬮置香臺旁。謂曰我病中。不及一一屬付。法名下一字。皆通字派。汝等各隨緣自取。上一字。某適拈得大字。宛若夢中故事云(染香集)西史氏曰。歸依而能預定法名何也。昔世尊於無量劫前。聞古釋迦文講涅槃經。得經中一偈。乃至賣身供養。願來世成佛。亦同此號。是故今日如來。亦號釋迦文。今明師與某。亦無量劫前。願重緣深之所致耳。然則欲生安養。而慮其不遂者。從可想矣。

一禪

一禪。海甯人。俗業屠。年四旬。痛悔前非。思唯出家。可解此業。遂於本邑海音寺祝髮。旋受具。任監院職。誦經念佛。發露懺悔。迴向淨土。誠懇翹勤。二十餘載不倦。嘉慶十二年。年六十八日。退監院。閉關數月。至臘月二十八日。命眾念佛一晝夜。次早沐浴禮佛而化。闍維。得白色舍利。數十粒(染香集)。

際醒

際醒。字徹悟。號訥堂。姓馬。京東豐潤縣人。幼通經史。薙染 後。徧歷講席。博貫性相兩宗。而於法華三觀十乘之旨。尤為心 得。參廣通粹如純禪師。明向上事。師資道合。乃印心焉。後純公 遷萬壽寺。醒繼席廣通。策勵後學。宗風大振。每謂永明壽禪師。 乃禪門宗匠。尚歸心淨土。況今末代。尤宜遵承。於是專修淨業。 主張蓮宗。日限枝香晤客。過時則禮念而已。嗣遷覺生寺住持。尋 退居紅蠡山資福寺。衲子依戀。追隨日眾。遂成叢林。醒為法為 人。心終無厭。但一以淨土為歸。每當開演如來。救苦攝樂之恩。 或至淚隨聲落。聽者亦未嘗不涕泗沾衣也。其語錄二卷。尤為切 至。略言吾人生死關頭。唯二種力。一者。心緒多端。重處偏墜。 此心力也。二者。如人負債。強者先牽。此業力也。業力最大。心 力尤大。以業無自性全依於心。故心重能使業強。今以重心而修淨 業。則淨業強。他日報盡命終。定生西方。不生餘處矣。如大樹大 牆。尋常向西而歪。他日若倒。決不向餘處也。何為重心。我輩修 習淨業。信貴於深。願貴於切。以信願深切。故一切邪說。莫能搖 惑。一切境緣。莫能引轉。假若正修淨業時。達摩祖師。忽現在

前。令我捨淨趨禪。可以立地成佛。我不敢從命。即釋迦如來。忽 爾現身。謂更有異方便。勝於淨土。令我捨此從彼。我亦不敢依 教。此之謂深信。假如赤熱鐵輪。旋轉頂上。不以此苦。退失往生 之願。又若輪王勝妙。五欲現前。亦不以此樂。退失往生之願。如 此逆順至極。尚不改所願。此之謂切願。信深願切。是謂重心。以 是修淨。淨業必強。業強則熟。極樂淨業若熟。娑婆染緣便盡。臨 終時。雖欲輪回境界。再現在前。不可得矣。雖欲彌陀淨土。不現 在前。亦不可得矣。然此信願要在操之於素。到時自不入於岐路。 如古德臨欲命終。六欲天童。次第接引。皆不去。專心待佛。佛現 乃去。夫四大分張。此何時也。天童接引。此何境也。苟素常信 願。不到十分堅固。當此時。對此境。而能強作主宰乎。又云。有 禪者。問曰。一切諸法。悉皆如夢。娑婆固夢也。極樂亦夢也。同 是一夢。修之何益。答曰。不然。七地以前。夢中修道。無明大 夢。雖等覺猶眠。唯佛一人。始稱大覺。當夢眼未開之時。苦樂宛 然。與其夢受娑婆之苦。何若夢受極樂之樂。況娑婆之夢。從夢入 夢。展轉沈迷者也。極樂之夢。從夢入覺。漸至於大覺者也。夢雖 同。而所以夢者。實不同也。可概論乎。嘉慶十五年二月。預知時 至。辭諸外護。屬曰。幻緣不久。虗生可惜。各宜努力念佛。他年 淨土。好相見也。臨寂半月前。示疾。命眾助稱佛號。見空中幢 旛。無數。自西而來。告眾曰。淨土相現。吾將西歸。至十二月十 七日申刻。復告眾曰。昨見文殊觀音勢至三大士。今復蒙佛親來。 接引吾去矣。眾稱佛號愈厲。醒面西端坐。合掌凝眸曰。稱一聲洪 名。見一分相好。言畢結印而逝。眾聞異香浮空。露龕七日。貌如 生。髮白變黑。闍維。獲舍利百餘粒。世壽七十。僧臘四十九,(徹悟 禪師語錄)西史氏曰。修禪修淨。而獨歸心於安養。迹其梵行之精 嚴。導人之切至。抑何與蓮宗尊宿。如同一轍歟。為人師。作佛 祖。吾於是見之矣。

起信

起信。字香海。姓單。富春人。父華藏。博通內典。明向上也。令信出家。往南屏求戒。教看誰字話。信窮參力究。嘗徹夜不寐。兀坐一室。如木偶然。嘉慶元年七月望。登吳山值夜分。見燈光互暎。晃乎心目。有省。歸語華藏。華藏復令徧參知識。至蘇州。遇會一傳公。示念佛法門。信即返杭閉關古梅庵。日課彌陀十萬聲。偶為詩都指歸淨土。有念佛歌曰。念佛好。念佛好。萬事從頭一筆埽。幾回背父走風塵。旅邸神魂多顛倒。不參禪。不矜教。一鑪香篆縈繚繞。奔波肩擔沒來由。訪友尋師何日了。休外求。只內照。

衣裏摩尼無價寶。應聲現色忒分明。六道神光誰欠少。水自流。山自峭。靜裏觀來都入妙。笑他名利日忙忙。自在真修誰能造。月沈西。鐘報曉。漫說容顏未衰老。古來賢哲若河沙。誰非白骨埋荒草。獨此心。無壽夭。脫離苦海無煩惱。百年身世等空華。空華勘破一長嘯。鉢囊懸。柱杖抝。撇却塵緣歸路早。人生定數已安排。佛本天真非矜造。閒住庵。嬾談道。吏難役兮君難召。禪牀鎮日坐忘機。碧眼胡僧覷不到。曝晴檐。補破襖。一盂脫粟隨緣飽。敢云閉戶慕清高。亦非目視諸方藐。生寡交。死絕弔。氣盡皮囊便撇掉。土埋火葬總由他。不賸兒孫免不肖。苦莫悲。喜莫笑。總是浮生夢未覺。大家拋却瓜葛藤。刀環請唱還鄉調。有一言。最簡要。世人如入羅網鳥。欲脫羅網何處求。唯有勸君念佛好。十七年十月十九日。卒於東園隱修庵。臨終盥沐易衣。念佛坐逝。逾時。頂可灼手。舉體入龕。輕如一氎。華藏贊以聯句云。頂煖決生安樂剎。身輕顯示涅槃心。年三十七(寶頭吟并序染香集)。

真傳

真傳。字會一。姓何。蘇州吳縣人。年十九。遇賴珙和尚。指示佛乘。受五戒。彭二林居士。招入文星閣。傳執贄稱弟子。共修念佛三昧。年二十八。投杭州崇福寺出家。研究楞嚴。唯識大義。為人講說。詞旨明暢。後住嘉興楞嚴寺。矢志募修大藏經版。工興有日矣。忽疾作。退隱蘇州鳳巢庵。一意西歸。嘉慶十七年正月杪。謂其徒曰。爾等勿訝。明日余將去矣。至夜分。蹶然起坐。西向念佛。含笑而逝。年五十三(參茶老人集)西史氏曰。刊經助緣也。念佛正行也。疾作而專務正行。固宜矣。

達純

達純。字粹修。號悉檀。姓朱。嘉興桐鄉縣人。自幼薙染。住嘉興覺海寺。精修淨業。一十六年。建西方三聖殿。春冬啟念佛期。遠近觀感。緇素雲集。嘗行般舟三昧二次。一夕夢中。見大蓮華。從空而降。自此知見超卓。辯才無礙。彭二林居士。逖聞道行。延住流水居。及文星閣。領眾念佛。日課嚴密。常演講雲棲彌陀疏鈔。及天台教觀。歷十載不倦。嗣開法南禪寺。百廢具興。淨業無間。及天台教觀。歷十載不倦。嗣開法南禪寺。百廢具興。淨業無間。旋退隱殊勝庵。愈精念佛。嘉慶十八年冬示疾。次年春。料理院務畢。時其徒悟靈在南禪。手書促至。曰。余將長往。需汝一訣。二月十三日。集眾念佛。沐浴更衣。跏趺說偈曰。多生濁苦纏縣。一

旦逍遙變遷。快覩彌陀影現。廓然別有一天。合掌而終。年六十三。僧臘五十七(悉檀吟槀。染香集)。

靈徹

靈徹。杭州人。於郡之寶壽寺出家。精進念佛十餘載。年踰五旬得疾。集眾念佛。以七日為期。自亦力疾隨之。至三日。謝眾曰。吾 得淨土生矣。諸公勉之。言訖而逝。時嘉慶二十年(染香集)。

道守

道守。鳳陽人。出家九華山。三十年徧歷叢林。缾鉢蕭然。恬淡自得。後住嘉興鍾埭鎮古剎。杜門念佛者四載。嘉慶二十三年春。忽扁舟入城。徧勸檀越。專心念佛。意極懇切。次日相契數人往候。見寮門未啟。排闥視之。已趺坐化去矣(染香集)。

列權

列權。字天聖。海甯人。歸定高和尚為弟子。與徹迷同居延恩。念佛精進。嘉慶二十三年冬。謂人曰。吾將逝矣。走別四鄰。眾共驚異。欲送之歸。辭曰。勿爾。時尚未至。翌日晚課如常時。至二鼓始歸寮。及寺眾曉起。則趺坐終矣(染香集)。

佛度

佛度。安徽歙縣人。住蘇州南禪寺。過午不食。脅不貼席。專修淨業。嘉慶二十三年春。有疾。辭諸道友。端坐而化。 有僧絕相者。嘉禾人。亦居南禪。與度道誼頗洽。貌極陋。人多輕之。終日不言。持過午不食戒。晨禮四十八願。及大悲懺。餘時佛聲不絕口。夜則面西危坐。如是二十年。及度化去。乃曰。渠去我亦隨之矣。沐浴焚香。面西合掌化(染香集)。

覺源

覺源。字性海。安徽定遠張氏子也。幼穎異。九歲五經俱成誦。弱 冠入邑庠。文名日甚。顧無心仕進。每作出世想。閱華嚴法華。多 有契語。亡何父母相繼沒。遂決志出家。依金陵耆闍律師祝髮。禮 封崇皓清律師。受具足戒。時年已四十矣。自以出家遲暮。行苦 行。堅持戒律。不妄語。不非時食。手不觸金銀寶物。身不著獸毛 蠶吐。嘗於投子閱藏畢。行二時頭陀。徧參知識。聞焦山借庵禪 師。為洞下名德。特往參叩。機緣契合。遂承印記。復住山中閱 藏。愈深入教海。於華嚴奧旨。獨有心得。口誦手披。不下數百 過。乃至背誦不遺一字。常為緇白。開演大義。抉幽剔微。聽者豁 然。因自別其號曰。一直法界。已而棲心安養。日課西方佛名。十 萬聲。脅不著席者。數十年。晚年石谷成公。延居高旻寺。素患足 疾。雖至增劇。而六時禮拜。無少間。復加禮普明懺及彌陀四十八 願。禮己。即誦佛名不歇口。見人不談他語。唯以西方淨業。諄諄 勸勉而已。計居十餘載。緇白多欽其品。嘉慶二十四年六月。忽欲 歸焦山。成公堅留不可。歸甫逾月。示微疾。八月二十六日。晨 起。索浴竟。端坐念佛。如入禪定。闍維時。瑞雲盤空。有光五 色。從火際透起。獲舍利三大粒。瑩淨如玉。現藏本山。世壽六十 九。著有淨土詩百首行世(染香集)西史氏曰。昔人謂乘戒俱急。生品 最高。若有乘無戒。流入鬼神趣中。源如是持戒。如是參修。非乘 戒並急者乎。彼輕視木又。而高談般若。嗚呼危矣。

正真

正真。字達宗。湖廣湘潭縣人。曾參高旻昭月貞公。薦紳延主鷲峰古剎。初至則頹垣老屋。人不堪其憂。而真則晏如也。已而檀施普集。百廢咸新。次第建諸殿閣。復置田數百頃。率眾念佛。凡來求法者。雖臧穫所不忍棄。示以持名法門。維時宰官薦紳。遠近緇素皆服其品。太史姚姬傅。觀察章淮樹。尤為宏護。淮樹一日邀真。相對據榻。出其二妾令受經。真曰。受經之法。須正几中庭。焚香恭敬而後可。不然是慢法也。淮樹如所教。既離榻。則梁墜而榻碎。淮樹異之。率二妾同秉戒法。後舍二妾為尼。精修淨土。未幾。真慨然有隱志。屏絕諸緣。著淨土偈若干首。道光元年正月九日。令嗣法脫凡至寮。劇談安養樂趣。貌和神恬。旋自鳴魚。念佛時許。命凡過堂食粥。及復至。則真已新衣逝矣(染香集)。

東瓜和尚

東瓜和尚。遺其名。姓孫。杭州人。嗜食東瓜故名。出家華嚴庵。為人緘默。竟日遊行街市。寒暑無間。經十餘年。人莫測之。與鄰庵僧慧照友。將寂之前月。告照曰。新正六日。吾行矣。汝合來送我。屆期。和尚。赴法慧庵齋返。見照先在。曰。汝何來。照笑曰。汝與我約。特來相送耳。和尚曰。微子言。幾忘卻了。遂盥沐

新衣禮佛竟。謂照曰。既行。不可無偈。為我書之。偈云。終日走街坊。心中念佛忙。世人都不識。別有一天堂。怡然而終(染香集)西史氏曰。時至而忘歸期。前有道證。至此再見。何其生死自如乎。而究其所以致此者。無他。心即佛故也。今人念佛之功。日僅片時。且不能一其心於安養。而亦欲冀臨終之瑞應。難矣哉。

定基

定基。字琳琇。臨海人。出家於天台山。受戒後。徧參知識。晚居蘇州靜室。掩關九載。誓不食鹹味。刺舌血。書華嚴經。八十一卷。日誦阿彌陀佛。為常課。道光元年。詣鄮山禮阿育王塔。臂香供養。塔中舍利。現黃白二珠。大如蓮子。光耀炫目。既歸得蠱疾。醫藥罔效。法侶乘戒往視之。策以一心念佛。求生淨土。基曰然。即於臥榻前。供接引佛像。令庵內僧眾。輪流念佛。至七日。忽起坐。索浴易衣曰。速邀乘公來。其徒從之。乘戒至。基謝曰。蒙君示我念佛。今晨見大勢至菩薩接引。我得中品中生矣。遂斂目合掌而逝。眾聞異香。彌時方息。年五十八(舍利瑞應錄)。

悟靈

悟靈。字軼羣。號幻如。浙之海昌金氏子也。幼有出塵志。見佛輒 膜拜。洎九齡。善病。亟請於父母。求出家。許之。乃脫白於本 城。安國寺西房。禮象隴上座為師。旋圓具於杭州昭慶寺。時悉檀 復逐字禮華嚴法華金剛圓覺等經。純公見靈脚根穩密。即授衣拂。 靈於淨十法門。諦信不貳。父早歿。勸母周氏。發往牛願。母後果 無疾。念佛而脫。其兄蓮隱咸而出家。純公寂後。靈繼席南禪。三 年引退。居松江韋陀庵。精舍數楹。塵囂不到。與蓮隱同居。以念 佛為日課。嘗於中夜禪觀中。見天上眾星。由四方翕聚。成憶佛念 佛四字。字大尋丈。晶光晃耀。自是目炯炯有光。凡緇白聞人以及 農販牧豎。皆見而生。敬感化念佛者不下數千人。靈既專志淨業。 念從上往生諸人。自淨土聖賢錄以後。無有續集。而高人輩出。不 可湮沒無傳。於是廣採博訪。輯為染香集一卷。自嘉慶以來。凡染 香於此法門者。罔弗紀載。越五年而書成。刻行於世道光八年春患 噎隔。集緇白交好。告以別期不久。諸君幸各自愛專志念佛。以圖 後會也。自製影堂聯句云。泥牛吼落江心月。木馬嘶歸海上雲。絕 醫藥。一意西歸。入五月而劇。人來問疾但曰。生死事大。各自努 力。便口佛喃喃而已。十七日西向趺坐。持名。或問臨行一句作麼

生。曰。阿彌陀佛。良久。聲漸微。泊然歸寂世壽六十一。坐三十五夏。三日合龕。貌如生(染香續集)西史氏曰導母往生。感兄出家。可謂極孝悌之大者矣。至其見星成字。葢精誠之極。心光發現耳。修淨業者。勿懷疑貳焉。

圓融

圓融。字竺峰。姓姚。湖州德清人。年二十出家。薙染於杭州石屋 嶺煙霞寺。旋於昭慶律寺受具足戒。持守無缺。而篤好禮念。以往 牛淨土。為一牛決定志願。不自住庵。恒依人以修。謂可免雜用心 也。亦不定居一處。合則留。不合則去。意氣灑落。不為膠執。其 所住處不樂隨眾作務。常靜掩一關。禮念並行。不禮則念。不念則 禮。無一時間斷。亦不少參以他法。竟以此二事終其身。嘗於一日 午間。念。阿彌陀佛名。魚聲朗朗。相應徹一夜。直至次日晡時。 人見其終無休歇。大聲喚之。始止。自謂纔如半日耳。問其飢否。 則曰我口中甜水如蜜。常盈常嚥。受用無量。更不思食也。脅不貼 席者數十年。故少夢。偶有夢。亦不離禮念。更無異緣。其夢中常 見佛菩薩活動如牛。間作獎勵之語。有時韋馱尊天導引念佛。葢其 所夢皆類此。道光十年。三月十九日。寂於杭城東園之天華庵。前 數日。示微疾。自知時至。略屬庵主數語。即默自持念。更無他 言。寂後示頂煖相。閣維於龍慶寺之普同塔。香柴無多。頃刻化 盡。世壽六十四。不畜徒(染香續集)西史氏曰。居無常者。真解脫 也。不畜徒者。真乾淨也闍維速化。謂非不戀世緣之明徵哉。

悟開

悟開。字豁然。號水雲道人。姓張。蘇州木瀆人。幼孤。讀書聰慧。喜經史根柢之學。而淡於功名。家貧。棄儒為賈。一日見僧背負警策生死文句。市中行魚勸人念佛。即猛省遂受三歸五戒。已而辭親。禮祥峰文公脫白。旋秉具於高旻如鑑和尚。留住過夏結冬。窮參力究苦不得入。一日偶觸踏破鐵鞵無覓處。得來全不費工夫語。本參一句。廓然頓現。復閱古德。諸訛公案。皆據實供通。旋開法於荊南顯親寺。未幾引退。歷居雲間練川支硎等處。皆水邊林下。有所修建檀施不足。即自罄其鉢囊。不住。則包裹以行。無貪戀心也。後歸住靈巖之寶藏庵。所至白衣向化。尤夥。一以淨土指歸。著有念佛百問。開示後學。自題偈曰。我以大悲心。闡揚念佛法。仰祈三寶尊。慈悲加護我。假此螢火光。化作智慧燈。照耀於世間。引之深入佛。念佛願往坐。還來度含識。西方不退轉。直至

成菩提。道光十年入夏疾作。寄書遠道諸友。諄諄以生死事大為勗且有秋盡當西歸之語。常住事宜。以次了畢。絕藥食。九月二十日凌晨。向西趺坐。合掌誦楞嚴呪竟。接佛號觀音號。良久聲微。奄然而化。恰在立冬前二日。次日入龕。頂相猶溫。送者數百人。咸讚歎焉(染香續集念佛百問)。

方海

方海。字普澄。號西臺。姓崔。湖州烏程人。年二十一。入天台華頂寺祝髮。旋受具於清涼寺際雲禪師專心閱藏。淹貫諸論。已而駐錫蘇州杯渡庵。純提淨土。廣勸緇白。從而信向者甚眾。先後遭父母喪。日禮華嚴法華。諸大乘經。代親廻向。生平所著淨土詩。及書寫經論無算。道光二十一年七月。忽語人曰。我月內將行。諸未了願。屬付汝等。翌日而病。至二十七日。見幢旛招引。曰。佛來迎矣。索筆作偈。據几疾書曰。七十年來夢幻多。彌陀一句盡消磨。而今直入如來地。空有雙忘禮寶陀遂擲筆而逝。世壽七十。僧臘四十九(西臺賸稟)。

昌茂

昌茂。字在經。紹興人。年二十五。出家於南海積善堂。詣鄮山舍 利塔前。然指供佛。徧參名山知識。晚年住蘇州松雲庵。終身供奉 阿彌陀佛。及地藏菩薩。見人輒談因果。勸修淨土。歸依者盈千。 牛平不放燄口。曰無德行故。受人銀錢。隨受隨施。嘗刊佛經數 種。及萬善同歸等書。又鑄大鐘三具。發願度地獄眾生。道光二十 八年。正月二十三夜忽患胃疾。自知將終。禮佛誦經。益加嚴密。 命激歸依弟子某某來。時夜將半侍者勸待天明。曰。白菩薩至。吾 定四更時去矣。口中念佛不絕。令沐浴更衣。果至四更。危坐而逝 年八十三。闍維得青白色舍利十餘粒(王吟軒述)西史氏曰。人疑白菩 薩。為無常惡鬼。故師之生西。疑信者各半。余昔聞師言。江河社 稷之神。不敢僭受菩薩之號。夫神且不可。況鬼乎。白菩薩者。或 觀音應現也觀其捨報安詳。合諸素行。往生無足疑者。 總論曰。自蓮宗之教行。有志之士。聞風向化者盛矣。顧念佛者如 牛毛。往生者如麟角。究其病根。信行願不切故耳。如上諸公。或 明向上而理事圓融。或專淨行而戒忍堅固。卒乃出輪回。登聖域。 甚哉。其善牖後人也。彼身作沙門。而心非沙門者。覩此當何如愧 奮耶。

往生比邱尼第二

湖上老尼

湖上老尼。不詳其人。念佛誦經。極虔謹。精嚴戒律。有道人每歲一來。來則劇談彌日。然後去。一日尼預與道人約。待之不至。自言將逝不得與此友別。柰何復待數日。又不至。乃命一舁龕斷橋上。手執線香一枝。從容入龕。頃之火發。遂自焚。觀者如堵。至身已焦黑。念佛聲猶不絕云(何士瑗陰隲文註釋)。

本印

本印。字松岐。吳縣人。幼多病。因發願出家。年二十五。父母送之城中。圓通庵薙染。尋受具戒。別買屋數間以居。名曰觀幻。戒行潔清。勤修福業。歷諸名剎。供佛飯僧。迴向淨土。乾隆四十五年八月。自九華歸。結期禮大悲懺。甫逾二七。忽感微疾。曰。吾生緣其盡乎。遂輟懺。專持佛名。至十月初旬。臥牀七日。右脅西向。念佛無間。已而屬付後事畢。命其徒誦阿彌陀經。至三周。寂然而逝(西方公據集驗)。

遂欽

遂欽。字越成。無錫人。九歲出家。稍長遇一尼師激發。專持佛名。行住無間。尋住蘇州南園白衣庵。興復殿堂。念佛益切。年五十。始受具戒。至五十五。其年三月。雞初鳴。召其徒曰。吾將去矣。徒曰。師無他恙。何出此言。因泣下。欽曰。癡人。哭我何益。認真念佛可爾。遂趺坐西向。同稱佛名。盡炷香乃逝。事在乾隆五十三年(西方公據集驗)。

律宗

律宗。字聖可。嘉定人。三歲失母。其祖母擕至蘇城圓通庵。尋薙染受具戒。少好禮佛。長誦法華經。苦不能解義。因詣金山。及杭州崇福。參究累冬。歸而專修淨業。屢詣諸名山。供佛飯僧。年五十三。得咳疾。遂閉關不出。以西方為期。至年六十四。正月望。集諸緇白。同稱佛名。至日昃。顧視左右。勸勉修行。語劇苦切。尋舉手稱西方極樂世界。大慈大悲。阿彌陀佛。如是者三。趺坐而逝。蓮華香滿室中。事在乾隆五十五年(西方公據集驗)。

佛琦

佛琦。字見琳。長洲縣人。自少不願有家。既長。其母送閶門外雨華庵。薙染。尋受具戒。已而受城中崇佛庵。尼道堅屬付。繼為庵主。募金千餘兩。造西方三聖旃檀像。高八尺。歲結七日期場。集淨行僧。為念佛會。歷諸名山。供佛飯僧。為常州天寧寺。置田三十畝。晚而專修淨業。將逝前三日。見菩薩現身。兩童子侍。或言聞菊花香。琦曰。此青蓮華香也。乾隆五十六年。八月晦。有近事女問疾。琦令扶起。集眾焚香。稱佛名可二千聲。遂逝(西方公據集驗)西史氏曰。飯僧作福。在家人恒有之。今出家女眾。亦屢見焉。謂非能破慳貪者乎。雖然。女眾可以修福。而號為沙門者。愈當精進。若夫但圖人之供養。而不知己之承事。嗚呼。其亦可以已矣。

蓮芳

蓮芳。不詳其所出。居崇佛庵。目擊琦往生事迹遂亦密密行持。年 三十餘。得疾。念力益堅。臨終。亦正念分明。面西趺坐。合掌而 逝。事在嘉慶十三年(染香集)。

朗然

朗然。姓沈。嘉善人。年十八。見嫂氏產難之苦。自誓不字。求父母出家。於邑之陶莊淨池庵。專志淨土。行持既久。閒忙無間。嘉慶十三年。謂其徒福緣曰。吾三月中。已三夢寶池。跏趺華中。往生有分矣。汝當篤志念佛。自然水到渠成。功不唐捐。慎母錯過。至三月念五日。無疾坐脫。年七十一(染香集)。

妙成

妙成。湖州菰城何氏女。生有慧性。髫年。即容止端莊。不同常兒。母故奉佛。每見母舉佛號。便合掌相和。年二十一。適同里王生。未半載。夫亡。翁亦信心念佛顧家貧。成勤紡績。以供菽水。朝暮則誦華嚴。持佛號。為常課。如是。十餘年。後翁出家為僧。姑繼亡。成亦投本城北門外廣嚴庵為尼。旋受具戒。持守嚴恪。益專志誦經念佛。甘棲淡泊絕意攀援。嘉慶十九年。示微疾語侍者曰。吾生緣已盡後三日。當西去。若輩幸自努力修持。或有見期。勿忘吾言。至第三日。正趺坐誦佛。忽舉首曰。接引佛已到。吾行矣。即瞑目而化。年四十七(染香續集)。

道乾

道乾字世禪。嘉禾雙溪陳氏女。年十七。出家於秀州之蘿庵。喜清淨自居看古德機緣。遂發明向上志。圓具後。詣天台國清寺。參寶林珍公。見時便問。如何是大人相。珍曰。待汝除卻五障來。即向汝道。乾曰。與麼。則瞞和尚去也。珍曰。汝那裏學得這度頭來。乾不覺汗流浹背。便禮拜。珍復問曰。如何是大人相。乾展兩手不之。珍公印可。旋受衣拂。乾既得旨。罷參。住南湖之草庵。庵越取不堪。處之晏如也。操履真實。順逆一如。平居一字一禮。三轉華嚴。課大般若經數十部由是道風遠著。施者雲集。次第建諸殿堂。其庵居偈曰。學道殷勤年復年。從今不著有無邊。歸家之事也。好為人耕劫外田。又於庵中設念佛堂。晝夜魚聲不絕者。至明日寅時。當去矣。至時說偈曰。八十八年。無貪無戀。歸去來母。水清月現。命眾同聲念佛吉祥而逝(染香集)西史氏曰。自古及今。禪淨雙修。而出自女眾者。葢鮮矣。至其居不求安。殷勤辦道。宛具大人之相。苟非真實了當其可勉強為之耶。

蘭若庵尼

蘭若庵尼。失其名。姓陳甯國郡西世家女。西禪寺僧某。未出家時。聘為室。後某棄家為僧。尼亦出家於三乘庵旋移居蘭若。日則隨眾作苦。夜則獨坐念佛。性甘淡泊。其兄時遺衣食。卒乃卻之曰。我既出家。若常與在家昆季往還。仍如未出家矣。後念佛坐化。時當酷暑。七日肉身不腐(染香集)。

道悟

道悟。字慧心。姓汪。松江華亭人。早喪父。寡兄弟。與祖母母氏同居。家甚貧。守貞不字。已而投吉祥庵出家。旋詣地藏院受具戒。念佛精進。道光十三年。六月。母氏念佛而逝。七月。祖母亦逝悟於八月五日。請戒師道生和尚。告曰。大事了畢。吾欲西歸。懇置龕一具。明日。邀眾念佛一天。以為助緣。是晚香湯澡浴。及旦。集眾念佛一[一/水]日。至夜告曰。佛來接引矣。跏趺而逝(楊藕槎筆記)總論曰。或謂女人有三隔五礙。何以得生淨土。是不知眾生之身。皆由業造。視業輕重而分男女。今以女身而決志出家。斯其宿業決定消除。以是而登清泰之鄉。成菩提之果。而女身男身。了不可得。復何有所隔礙哉。

淨土聖賢錄續編卷一

淨土聖賢錄續編卷二

往生王臣第三

張師誠

張師誠。字心友。號蘭渚。湖州歸安人。父夢日輪照窗。寤而生師 誠。母早故。事父以孝聞。少年登科第歷任封疆。為江蘇巡撫。見 蘇城殺業甚夥。屢出示勸戒。遇放牛河等處。則嚴捕魚之禁。署中 不宴客。不殺牛己而長齋奉佛。棲心淨十。白號一西居士擇前賢淨 十論說。輯徑中徑又徑一書。後附淨十歌詠。其自作數十首。最為 警切。今錄其八首。一云。佛緣幸遇識鴻名。火急西歸此一生。不 向此生拼力去。胞胎再入墮無明。一云。纔提佛號眾魔侵降伏云何 到一心。口耳相聞心應手。牟尼歷歷字推尋。一云。全拋名利與悲 歡。切已無如此一端。斫斷愛繩憑慧劍。雲棲七筆萬回看。一云。 船乘大願度塵寰。自利利他念一般。先借枝棲蓮界穩。羽毛豐滿任 飛還。一云。執持無間矢初衷。尤在臨時一念融。堪惜坡公公據 在。未能著力棄前功(自注東坡常以彌陀像自隨謂生西方公據似有志於淨土者 乃疾革時則曰西方不無然箇裏著力不得錢世雄云固先生平時履踐至此更須著力曰著 力即差語絕而逝是東坡臨終竟未著力不能徃生良可歎息)。一云。最怕臨終神 識迷。舌根堅硬氣難提。若非平日心專一。那得資糧助往西。一 云。唯心自性理難明。水火鏡觀取譬精。念到一心心佛合。臨時自 有佛來迎(自注般舟三昧經水火鏡之喻謂以鏡具水火之性喻眾生本具佛性之力也須 假日月之光來照者喻彌陀慈光攝取之力也以珠艾能引水火者喻信心念佛之力也故知 唯心淨土自性彌陀非託空參果能專注靜修念到一心不亂則此心此性克復其初與佛融 成一片臨命終時自能見佛)。一云。稍留一愛未全捐。便恐臨時被此牽。 欲出娑婆除必盡。次公名論許重詮(自注宋楊次公嘗謂愛不重不生娑婆念不 一不生極樂夫極樂之生必由念一洵為至論而欲出娑婆設有一愛未除即恐難離世網非 獨愛重者然也當云愛不除不出娑婆似更精到)道光八年。年六旬餘。乞假歸 里。靜居斗室。一意西馳。逾年卒。臨終時。誦彌陀經畢。纔與佛 號。至第五聲。寂然而逝(張蘭渚年譜。徑中徑又徑。汪石心述)。

章攀桂

章攀桂。不詳其人。乾隆間。服官在外。篤信淨業。自號寶嚴居士。與投子沙門世惺。輯蓮宗集要一書。自為序曰。淨名云。隨其心淨則佛士淨。華嚴云。應觀法界性。一切唯心造。皆唯心淨土之旨也。樂邦苦域。金寶泥沙。垢淨心生。麤妙境現。此理唯禪淨雙

修者。可以默契。初機淺學。何由得其門哉。永明料揀云。但得見 彌陀。何愁不開悟。而雲棲謂持名一法。徹上徹下。大小兼收。所 以修淨土者。當以持名為正課。以修一切善法為助因。正助既分。 而後修行之路。較然不惑。蓮池大師疏彌陀經。以信願行。判為一 經資糧而以一心不亂專持名號為宗旨。洵確論與。余素慕佛乘。主 心西極。雖宦遊幾三十年。夷險備歷。而十念定課。未嘗一日忘 也。己西春。與投子憨公遊浮山。至華嚴寺。偶於案頭見龍舒淨土 文。理明詞達。誠為淨十津梁。但篇帙稍繁。讀者或不終卷而廢。 乃與憨公。徧取淨土諸篇。細心商確。重加編集。冗者節之。缺者 補之。分門別類。略如蘧庵之淨土指歸。而大旨一主阿彌陀經。以 持名為宗旨。故開卷即以此經冠首。俾行人知先守約。二六時中專 持名號。以為正行。而以深信發願。為往生前茅。信願行三者相 須。淨業乃成。葢淨土為佛門。之異方便。而持名又異方便中之方 便世。書凡六卷。帙雖半於龍舒。義實該乎蓮藏。爰付剞劂。質之 四方淨侶。倘以為不背教理。不越淨規。愚者暫得心開。智士益增 淨行。斯願足矣。若夫唯心淨土。則在當人默契。固無須門外漢之 饒舌也。後莫知其所終(蓮宗集要)總論曰。向來載宰官往生。不下數 十人。然皆古記所傳。而近代者無聞。余廣採博訪。寥寥然僅得二 人。焉何夙因之易昧若斯也。嗚呼。豪貴學道。自古為難。況當像 季。不更官然。今者。一則居尊貴。而不戀世榮。一則歷夷險而不 廢定課。有志淨業者。當以二人為軌則。所謂案牘雖忙姑少置朝朝 十念不官虧不覺深味乎其言哉。

往生居士第四之一

黄武城

黃武城。泰州姜堰人。世業儒。遇法宗和尚導以念佛。康熙十年。 染微恙。沐浴更衣。請法宗至決擇臨終四關。忽猛省。頓斷恩愛。 不容妻孥相見。一心念佛。三日後。趺坐合掌而逝(蓮藏)。

吳如庵

吳如庵。徽州人。入籍常州宜興縣。生平信向佛乘。參璞中和尚。 遂修淨業。康熙十二年夏。示微疾。以數珠分給子女。教之修持。 其姻親俞有光往省之。與如庵談及念佛法門。如庵曰。念佛之法。 須間也念。忙也念行坐也念。夢寐也念。乃至鬼哭神號無不念。纔 是真念佛的人。欲得此真念者。只在一信字。汝當緊信。汝當緊 信。乃說偈曰。參<mark>禪</mark>念佛本非歧。三聖慈悲引我西。普勸世人勤念佛。白蓮臺上見阿彌。遂命家人。朗念佛號。趺坐而逝(蓮藏)。

愈有光

俞有光。新安人。幼居宜興。與吳如庵同修淨業。日持佛號五千。 金剛經三卷。發願往生。後見如庵西歸。益加精進。書念佛緊要四 字於牀右。以自警策。康熙二十三年三月三日。徧別親友。作偈 曰。西方淨土是吾家。一句彌陀度歲華。清磬數聲明月上。此身隱 坐白蓮華。初八日。示微疾。謂家人曰。吾去。汝等切莫啼哭。當 念佛相送。十二日。閉目寂然。眷屬圍繞。忽張目曰。念佛緊要。 言訖而逝。年七十八(蓮藏)。

蘇起鳳

蘇起鳳。字岐山。崑山人。幼年矢志宗乘。徧參知識。有所悟入。一生戒殺。蟲蟻不傷。晚年篤修淨土。四威儀中。未嘗間缺。康熙三十八年。年已八十。時值嚴寒。擁被而坐。十一月二十六日午間。謂其孫甸方曰。淨土之緣熟矣。三日前即見佛來。吾不欲顯言耳。今夜子時。吾往矣。更餘披衣而起。焚香然燭。端坐向西。命家中人念佛。自亦隨之。將三更聲音漸低。寂然而化。有吳敬山者。與起鳳同里。為蓮社友。年逾七十。發願參學。甸方以其年老。勸之專修淨土。可以一生成就。敬山信之。晝夜念佛不輟。未及一載。其至戚友來。謂旬方曰。今早敬山見護法神現。接引往生臨行安然坐脫。屬我致謝是以來耳(西歸直指)。

惲又騑

惲又騑。常州人。素誦金剛經。長子嗣曾。季子臯聞。皆修淨業。 其年春。又騑疾作。二子呈蓮藏一函。又騑甚喜。二子曰。大人既 信淨業。何不從此修持。又騑遂以佛誕日茹素。日持佛號萬聲。至 五月二十六日。諸子進參劑。又騑不服。曰。藥醫不死病。乃舉念 珠云。佛度有緣人。時舉家忽聞蓮華香。諸子驚異。請曰。大人此 際意況若何。答曰。月白風清。香烟滿路。遂面西端坐而逝。事在 康熙三十九年(蓮藏)西史氏曰。修淨業者。不在時之久。而在信之 篤。又騑發心。纔一月耳。一念堅勇。疾證菩提。游移莫決者。此 誠可為龜鑑也。

王貞生

王貞生。崑山人。父彥敷。為崑庠善友。崇奉三寶。而貞生多習氣。不甚信奉。一日得病。見有長大黑鬼。謂是前世怨仇。貞生怖甚。遂勇猛念佛。求生西方。念佛稍懈。鬼形遂現。由是往生益切。念佛益銳。念至數日。鬼不復現。臨歿時。至氣盡力竭。其聲漸低。隱隱向西去。(西歸直指)西史氏曰。臨終善友。最為難值。貞生所見惡鬼。明為怨仇。實則善友也。且貞生既得往生。惡鬼必能度脫。一得兩全。不可謂非幸也。

蔡鵬九

蔡鵬九。字資萬。蘇州西洞庭山人。世為賈。鵬九則好二氏書。與高人逸士遊。後遇唯然和尚。勸修淨業。始誦佛經。舉放生會。已而持長齋。自號虗白居士。亡何得疾。以乾隆四十五年。八月八日終於家。先一夕。洗浴。將旦集家人與訣。謂曰。世間眷屬。報盡則離。圖久長者。當結法緣。若輩勉之。眾哭。曰。勿哭。為我。齊聲唱阿彌陀佛。復謂其子曰。吾蔬食者。一年矣。喪中設祭享賓。勿用肉。汝若憶我須常斷殺。能斷殺者。是為孝子。勉之。遂轉面向西而逝。及將斂。遷尸於堂。向西如故。其子跪而祝之。面始仰。卒年五十(一行居集)西史氏曰。往生者。首重慈心不殺。經有明文。今汝若憶我一語。直身眾生之身。心菩薩之心矣。悲哉言乎。

唐漚和

唐漚和。不詳其出。身列武庠。初不信因果。晚年與鑒機子遊。始 信向。因教以受持十念法。精進不懈。年九十六。示微疾。忽躍起 合掌曰。佛來迎我。溘然而逝(蓮宗集要)。

陳君魁

陳君魁。池陽貢生也。遇淨川老僧。指示念佛。遂長齋戒殺。精勤禮念。晝夜不輟。發願印施龍舒淨土文。結菩提緣。未半年。兩覩阿彌陀佛。身滿虗空。末後又見。自知往生時至。沐浴焚香。手執數珠。端坐而化(蓮宗集要)。

陸士銓

陸士銓。字近堂。蘇州元和人。始習扶鸞術。歸玉壇為弟子。後為 壇友祈疾。神教禮梁皇懺。士銓因禮懺發心。遂詣天寧庵。受菩薩 戒。會有寂根菩薩。自極樂國來。降於玉壇。開闡淨土法門。教人 痛念生死。屏絕歧趨。一心念佛。先後凡十一會。由是與會者。始 知回向極樂。然故習未忘。多有出入。唯士銓一意持名修觀。誦法 華經。長齋一二年。尋得瘍疾。漏下減食遂開肉戒。而疾亟。臥牀 不能起。自知將終。愧悔甚切。先歾前七日。屏葷腥。連稱阿彌陀 佛。有女年十餘。戒以持齋念佛。去時勿哭。及病革。目光上燭。 若有所見口稱白蓮白鶴。及諸上善人。復連稱佛佛。右脅而逝。異 香滿室中。時乾隆五十二年。五月十八日也。年三十九。已而諸友 詣壇。叩士銓生處。王天君報曰。陸子大幸。若非臨終正念。幾至 墮落。現已得生西方邊地矣。其明年。五月朔。士銓降壇示諸子 曰。有一件最切己事。人人不能逃。人人多忘却者。汝知之乎。現 前爾等。四大輕安。精神強健。曾不思一旦臥病於牀。魂離魄散。 東西不辨。南北不分。前路茫茫。毫無把握。隨業輪轉。受苦無 窮。唯有平生虔修淨業者。到時自見佛來接引。生蓮華中。受諸快 樂壽命無量。諸子有志斯道者。當講信行願三事耳。信者。信西方 之有淨土。猶此城之有閶胥。娑婆在東。猶此城之有婁葑。娑婆既 實實是有。淨土豈不實實是有。同在圓明覺海之中。舉念可到亦猶 同處一城之內。舉足可到也。既信得淨土決定可到。又須信念佛法 門。如穿衣喫飯一般穿衣免凍。喫飯免飢。念佛免生死。今日信明 日不信。未為真信。終身信。一念忽不信。未為真信。從今日去。 直至命終。一信到底。更無纖毫疑惑。方為真信既信有西方矣。又 信有念佛法門矣。空言讚歎。何益生死。故凡發信心者即當如教奉 行。今日信。今日即行。明日信。明日即行。切不可曰。我今後 生。且待耄年未晚。不見道青冢多埋紅粉骨。黃泉半是黑頭人。何 耄年之可待也。又不可曰。我父母之事未完。兒女之債未了。且待 閒暇無事時未晚。豈知無常迅速。鬼使臨門。不可向他道。我父母 之事未完。兒女之債未畢。且待閒暇無事時。然後來也。又有勇猛 一時。懈弛一時是謂人而無恒。譬如雞之抱卵。必其息息不離於 卵。俾熱氣相續。方能生育。若今日抱之明日去之。未有能生者 也。涵養蓮胎。亦復如是。至願之一字。尤為緊要。世間信佛念佛 者。固不乏人。然或求現生富貴。或求來世福壽。得好人身。不至 墮落。此為背佛意指。佛教。你出生死。你偏要入生死。佛教你生 極樂。你偏要住娑婆。一生信行。盡付東流。譬如耕田下了稗子。 而望其生苗也。有是理平。故發真信者。當行真行。行真行者。當 發真願盡此一生。決定不生天上人間。決定要生西方淨土。如此念 佛。方為隨順佛語。不至唐喪光陰諸子勉之。其後四年。嘗再降黃敬敷家。勖勉同壇。語多切至(一行居集西方公據書證)。

馬榮祖

馬榮祖。字宁良。浙江秀水人。少能文。弱冠補諸生。父母早逝。 事繼母甚謹。年三十。得咯血疾。又五年疾甚。進食輒吐。有僧祥 峰者。未出家時。與榮祖習。及是參學還。宿慧頓開信解通利。榮 祖心異之。語及却病方。祥峰曰。子病殆非藥石所能療。子能放下 萬緣。觀佛念佛。日久功深。坐斷無明。無量劫來。生死重病。直 下解脫。復何身病之患乎。榮祖瞿然有省。遂長齋修淨業。病良 己。先是夜夢虐空中。涌出壽字。不可算數。光明爛然。己而閱梵 書。云阿彌陀。一名無量壽。亦名無量光。適與夢符。益自喜以為 宿緣在是矣。尋讀六祖壇經。默契法原。愧悔交切。後詣山陰大覺 林。受三歸五戒。日持佛名三萬。阿彌陀經金剛經。各一周。兼修 淨觀。暇輒激諸梵侶。書夜課佛名。其年正月下旬。自蘇歸。閱月 病作。三月初。臥牀不能起。謂所親曰。我從三十五歲。發菩提 心。唯求嚴淨佛土。利益眾生。雖卿相之榮。視同敝蹤矣。今即沉 疴在體。然一念歡喜心。未曾少變。庶幾臨終正念。直往西方耳。 或問數口嗷嗷。何以善後。曰。此有天焉。非吾所及也。至十八 日。晚云。明日要大懺悔。晨起搭衣禮佛。向西端坐。誦阿彌陀佛 名數百。及雲樓發願文。盡炷香。乃就寢。又三日云。三聖現前為 我說法。我常在大光明中。其明日又云。菩薩以淨水沐我。洗我夙 垢。頓獲清涼。樂不可言。向晚。有友沈鴻調來視。問念佛否。 曰。念。鴻調曰。不可著相。曰。即心即佛。何著之有。遂屏諸穀 食。日飲茶二醆。己而唯飲淨水者二日。方向午。謂家人曰。佛來 迎我。連舉阿彌陀佛。右脅而逝。時乾隆五十六年。三月二十九日 也。年四十八。無子。遺命不立後。時祥峰和尚。方閉關蘇州文星 閣。修念佛三昧。其年冬夜夢三人入室。南向坐。其一僧服。旁兩 居士。神儀儼然。上有白光覆頂。祥峰禮足已。問三大德何來。僧 服者曰。西方來。祥峰曰。莫非阿彌陀佛國中人否。曰然。因問何 名。三人同聲曰。汝名甚麼。祥峰曰。弟子法名達文。僧服者曰。 却來妄語。祥峰曰。真也非妄。僧服者又問。汝名甚麼。祥峰曰。 弟子法名達文。僧服者云。還要妄語。祥峰曰。弟子實非妄語。如 何上座云我妄語。僧服者曰一切眾生。以妄為真。執假為實故受輪 轉。若有智者。知是妄語。即無輪轉。汝莫自迷失本真心。當知真 心無心。真知無知。覺知乃魔。佛無知覺。汝當信受。莫懷疑惑。 祥峰言下開悟。復進曰。上座之說的是佛法。不可思議。請問上

座。既自阿彌陀佛國中來。可曾見阿彌陀佛否。左一人答曰。我向汝說汝終不信。汝須親見始得。三人齊起。各向祥峰頂上一拍。為說偈曰。應當勤精進。修諸清淨業。因深則果實。慎勿生疑惑。又曰諸法從心生。諸法從心滅。心法本來空。取舍不可得。又曰。生佛心法等譬如夢中鏡。如幻三摩提。汝已知少分。偈畢。忽見馬榮祖。嚴整威儀。頂禮三人。三人即騰空。向西而去。空中樂音嘹亮。佛聲朗然。榮祖更向祥峰三拜。曰。蒙師勸我。修淨業。歸依三寶。今已生淨土。得大安樂。故求菩薩。來演妙法。以報深恩。又向祥峰三拜。合掌念佛。向西而去。適晨鐘乍發。遽然而覺。向晨書之為紀夢篇。祥峰後隱婁江福城院。臨終。預知時至。念佛坐脫(一行居集。西方公據。書證染香集)西史氏曰。前近堂以降壇而勖同學。今宁良以托夢而謝深恩。孰謂一生安養。杳無信息乎。雖然機緣未熟者。不可一槩例也。

彭希涑

彭希涑。字樂園。號蘭臺。蘇州元和廩牛。即二林居士從子也。年 二十六。舉於鄉。少喜蔬食。成童後。即長齋五年已而得咯血疾。 始開肉禁。然因病發心。遂信向佛乘。持六齋。誦華嚴經。日課西 方佛名。求生淨土。雖舟車南北。未嘗廢忘。嘗作回向詩十首。一 云。輾轉因緣十二支。塵沙劫數了何時。空王足下勤稽首雙淚潛流 不自知。二云。風力吹人豈自由。幻緣牽引惹閒愁。病魔天遣重重 逼。垂死方悲不早修。三云。由來色相盡空虐。萬劫貪癡未易除。 何似彌陀一句子。六根收拾了無餘。四云。營營逐逐不如閒。人命 須知呼吸間。却恐修行迷正路。臨歧回首黑漫漫。五云。靜觀深時 落日斜。了知極樂路非賒。十年蕩子無歸處。一念回光便是家。六 云。疏風林下百千樂。好鳥枝頭和雅音。一百八粒菩提子。種得蓮 根十丈深。七云。心心相續憶彌陀。萬事浮雲一任他。何待命終生 彼國。現前先已出娑婆。八云。塵障空時法身現。潭心月暎為波 清。大千無盡音聲海。收拾聞根絕送迎。九云。佛心念佛原無隔。 六字縣縣覺亦忘。我已千生病煩惱。醍醐此日灌焦腸。十云。我為 菩提發宏誓。不求福利與生天。盡虐空際普賢願。未到蓮邦怎得 圓。二林居十以雲棲往生集。事詞太略。欲重加採葺。續以近今故 事。甫創其凡。希涑欣然任之與妻顧氏。篝燈鈔寫。成書九卷。名 曰淨土聖賢錄。刻行於世。又嘗手書法華經一周。累年始竣。乾隆 五十八年十月三日病瘧且痢。自房中出。就母寢。絕口不及家事。 日唯勸母念佛。曰。他日西方好相見也。先歾前三日。請澄谷和尚 至牀前設几案。受三歸五戒。懺悔發願。益加懇至。自言一二日

間。淨念現前。寶池蓮華。宛然可掇也。十三日早。命家人張接引佛像。移榻向西。仍請澄谷和尚至。曰煩師。助我念佛。至晚口喃喃誦佛名。右脅而逝異香滿室中。年三十三。二林居士贈以詩曰。 偏界蓮華撲鼻香。翛然撒手便還鄉。昌黎不識西方路。孤負當年十二郎。

顧氏。名韞玉。早慧能詩。年二十九。得疾亦念佛坐逝(蘭臺遺槀)。

彭紹升

彭紹升。法名際清。字允初。一字尺木。蘇州長洲人。幼聰穎。年 十六。為諸生。明年舉於鄉。又明年。捷南宮。以名進士終於家。 初不信佛。好世間文字。志存利濟。忽自省曰。吾未明吾心柰何。 或告以道家修鍊法習之三年不效。後讀佛書。爽然曰。道之所歸在 是矣。始信向佛乘。慕梁谿高忠憲。廬山劉遺民之為人。故又號曰 二林。以兩公修學地。同名東林也。性純孝。居母喪。宿殯側者三 年。父殁。建念佛道場。又願以平日所誦華嚴經十部。彌陀經一千 部。金剛經一千部。佛號一千萬聲。代父回向西方。已而盡棄所 習。專心竺教。好方山永明之書。尤推蓮池憨山。為淨土之前導。 年二十九。斷肉食。又五年。從聞學定公。受菩薩戒。自是不復近 婦人。以知歸子自稱。嘗言志在西方。行在梵網。其自誓。文云。 若我際清。既受戒己。還復破戒。增長惡法毀壞善根。唯願護法諸 天。速行誅殛。為世鑒戒。若我際清。克厲身心。護持戒品。盡此 形壽。必生安養十方三寶。為我證明。俾我速得念佛三昧。臨命終 時。遠離塵垢。親見彌陀。脫然西邁。更無遮障。見者聞者。如我 發心。生極樂國。獲無生忍。回入娑婆。普度有情。俱成正覺。後 閉關文星閣。修一行三昧。顏所處曰。一行居。作閉關詩十首。一 云。福德門頭事孰真。脚邊狼籍幾多春。而今回向無生國。蜨夢龕 中瞌睡頻。二云。我佛真身徧十虐。塵塵寂滅更無餘。休將知見重 分別。一念回光識得渠。三云輪珠一串無頭尾。念念明時粉粉圓。 六字打開無盡藏。拈來放去只如然。四云。園居深處悄如山。長日 何人更扣關。報與諸公勤護惜。休從門外苦追攀。五云。堯峰山下 雲深處。聞說幽人策短藝。多事東風輕漏泄。經聲又度小樓西。六 云。一枝梅蕚破寒林。得意春風枝上禽。聲色堆中休錯過。焚香為 爾念觀音。七云。舉首低頭放下看蓮池不隔一毫端。迦陵音裏分明 說。常寂光中休自瞞。八云。閒話閨中破寂寥。人傳此夕是元宵。 法華課罷無餘事。龍井新茶試一瓢(目注時為二女子授法華經)。九云。 重向尼山訪舊盟。鏗然點瑟話無生。蓮華脚下如輪大。沂水春風掉 臂行。十云。香山老子最清真。每到歧涂一問津。莫悵華原消息

斷。谿邊依舊十分春。又令畫工繪極樂世界圖。悉本淨十三經。依 正莊嚴。凡四易稾。閱半載乃成。自題偈曰。若人欲了知。三世一 切佛。應觀法界性。一切唯心造。我讀華嚴偈。信入淨土門。由諸 佛淨願。成就妙莊嚴。淨願如虐空。不拒種種相。無邊功德水。涌 現寶蓮華。一華一眾牛。具有如來藏。寶池及寶樹。圍繞寶闌楯。 重重妙樓臺。充滿虐空界。或浴香水流。或享上妙味。或趺坐經 行。或誦經聽法。或衣裓盛華。供養十方佛或上善同會。畢入菩提 場。眾鳥共天樂。暢發和雅音。從聞入思修。一念總超越。況乃無 量壽。安坐寶華臺。慈雲覆人天。諸根普一兩。聞法得解脫。直至 次補處。如斯利益事。思議何可窮。亦如彼書師。一心所轉變。不 離毫端量。現此寶王居。非我復非渠。一即徧一切。書與能畫人。 畢竟了無有。願見者聞者。如我所發心。憑茲一念功。自致不退 轉。何論萬億程。當處悉具足。又憫末法眾生。不具正眼。互相抵 觸。著一乘決疑論。以通儒釋之閡。著華嚴念佛三昧論。以釋禪淨 之諍。著淨十三經新論。以暢從上蓮宗未竟之旨。其居士傳。善女 人傳。淨土聖賢錄。隨機接引。世多傳而誦之。又嘗醵金萬兩。權 入出息。以剏佛宮。刊教典。飯僧眾。開折取堂以周窮乏。置潤族 田以贍貧族。舉恤釐會以濟孀居。立放生會以全物命。各有發願 文。回向淨土。於蘇杭僧舍。屏居十餘年。日有課程。預為終制。 俾無立後。乾隆六十年秋。下痢。仍居文星閣。入冬。精神漸耗。 將諸善會貲。一一屬付其姪祝華。令以後永久勿替。有僧真清。問 曾見瑞應否。紹升曰。有何瑞應。我大事在來年開印日耳。至嘉慶 元年正月二十日清晨。作辭世偈云。出沒閻浮塵點身。流離瑣尾竟 何因。而今驀直西方去。瞥眼收回萬劫春。遂西向趺坐。念佛而 脫。時果為署中開印日。年五十七(居士傳。二林居集。一行居集。觀河 集。彭氏家譜。僧真清述)西史氏曰。余聞二林不若一林好。就了廬山去 錫山。竊深然其語。及讀一行書。而歎其去就之得官。讀決疑念佛 兩論。覺非一非二。無我無渠。乃爽然自失矣。

呂蔚若

呂蔚若錢塘人。樂善好施。篤修淨業。茄素二十餘年。晨夕課誦無間。嘉慶三年二月朔。抱疾。時苕溪章銓因事至杭。舍其家。夜夢一僧趺坐庭中唱佛。因問念佛何為。僧曰。呂某有善根。不日當歸極樂國土。君未之知耶。覺而異之。晨告其子文燕。愀然曰。吾父正月下旬。即屬付後事。謂於二月七日。往生淨土。今公夢如此。信矣。至初六日。其臥室徧滿蓮華香。經宿不散。翌日清晨。香愈

烈。自云阿彌陀佛。與諸菩薩皆來矣。乃趺坐合掌。唱佛號而逝。 章銓為之傳(染香集)。

曾庚

曾庚。江蘇寶山人。印顯觀察之子也。壯年舉賢良。不求仕進。好善樂施。尤喜放生。家中絕宰殺。有僧授以念佛法門。遂篤信力行嘉慶十三年九月。下痢。自知不起。念佛愈切。至十月二日。告家人曰。我歸期在今日矣汝等為我稱佛名。一切事不許告我。自起作書。別其歸戒師智照和尚。踰刻。令家人焚香。合掌正念而逝(染香集)。

陸西橋

陸西橋。以字傳。蘇州人。年少有才。而省試屢黜。乃慨然發出世心。與妻周氏。同修淨業。膝前止一女未嫁。一日西橋示疾。謂問氏曰。後七日吾行。矣汝勿令我女知。之恐其哭泣亂人正念。周氏曰。諾至期盥沐更衣。面西端坐。誦阿彌陀經。至白鶴孔雀句。舉目仰面。若有所見。寂然而逝。此嘉慶六七年。間事也(往生近驗錄)。

淩樹

凌樹。字吉人。松江婁縣庠生。喜講性理之學。言行篤實。鄉黨敬之晚年。閱雲棲法彙。遂發信心。常靜坐念佛。晨夕有定課。時松人多未知念佛法門。凌樹實倡之。繼起者遂眾。嘉慶十二年秋。得疾謂所親曰。我去必趁中秋好月色。至中秋夜。果念佛而逝。時月明如書(染香集)。

沈暢

沈暢。字紫林。元和武生。為人沈靜。以訓蒙自給。既而歸心淨土。凡念佛七期必與焉。節間解館。及歲終。輒居南禪寺念佛。一日忽謂其子曰。吾欲歸去。其子訝之越日示微疾。招沙門數人助念。合掌而逝。有顧居士者。亦居南禪念佛。先暢而去。西歸時。家人皆聞蓮華香。欲為延僧助念。居士曰無庸。我已坐蓮華中。見佛放光照我。我時在光中。不須燈燭也。如是三日。吉祥而蛻。香三日始歇。事在嘉慶十五年(西歸見聞錄)。

蔣龜蒙

蔣龜蒙。會稽人。壯年遊幕四方。樂行善事。尤注意淨土一門。嘉興楞嚴寺念佛堂。及放生會。皆其侶建晚年旋家。作淨室三間。為棲息地。中供阿彌陀佛像。日課洪名十萬聲。數年不閒。嘉慶十六年某月。預知時至。臨終前三日。徧辭親友至期邀僧十人於靜室念佛。白趺坐庭中。僧眾繞行持名。日將午。正當行香。合掌而逝(染香集)。

曹聖友

曹聖友。嘉善人。嘗患風病。手足癱瘓。進香杭之天竺。於佛前發願。念佛求生誓不退轉。從此行住坐臥。佛聲不絕。念至切處。必痛哭流涕。如是者十年。嘉慶十六年七月十一日。令其子到北港荻秋庵。請僧六人來家念佛。十四日僧至。聖友曰。吾十六日當西去。請師等三日相助。感謝不淺。即於是日始。每日念香十枝。行坐相半。聖友日隨之。至十六日晚。坐香甫及二寸。遂化去(染香集)西史氏曰。昔人念佛。痛哭流涕。今則釣譽沽名。即使勇猛一時。旋復怠弛。用力多而成功少者。職是故也慎之哉。

馮庭桂

馮庭桂。蘇州元和人。受持五戒。嘗於普福禪院。禮華嚴法華兩經。每日千拜。寒暑不閒。後居南禪亦然禮經之暇。即念佛不輟。如是二十餘載。嘉慶十八年春。預知時至。徧辭親故。安然念佛而逝。異香三日(染香集)。

浦文榮

浦文榮。吳江人。中年。歸依接待寺僧祥謙。秉受五戒。發心念佛。求生西方。數十年日課佛號不輟。有二子。一出家胥江禪院亦常至父舍。父子兄弟。同心念佛。嘉慶十八年。文榮年七十。感微疾。自知時至。命二子同稱佛號。合掌而逝。室中異香。竟日不散(染香集)。

鄭兆榮

鄭兆榮。字廷勳。吳江盛澤人。自幼茄齋好善。中年賈於漢口。家漸起。而善心益厚。先是有同事妻某氏。因病入冥。神責不孝。欲奪其命。氏急求免。神曰。爾欲消罪。須向善人徐大均商之乃可。氏醒。如其言。乃獲免。其徐大均者。素修淨業。兆榮至戚也。兆榮聞其事。遂信向念佛。日漸加功。慨然捐貲萬金。開善堂。濟貧困。回向淨土。客至無事。不交一言。晚年。自將久備杪枋壽木售人。時懷數珠及錢。往諸貧里。施勸念佛。遇隆冬號寒。雖解衣衣人。所不惜也。嘉慶十八年十二月。染微疾。至望日。子欲辭之他往。兆榮曰。去宜速歸。吾行有日矣。至期。面西趺坐。眷屬環立。兆榮曰。為我念佛。菩薩降臨矣。眾聞異香。移時而化。年七十八(染香集)西史氏曰世俗愚人。生前不修安養。但知預備壽木。以為安頓一生。及其身入棺中。無錢財者。付之一堆野火。有體面者。埋之萬里荒山。其為計亦左矣。今廷勳以壽木售人。其亦有鑒於此夫。

吳濂

吳濂。字芑謀。元和庠生。父奉佛。與師林寺某僧善。父病。僧頻來問疾。開示念佛法門。濂在旁聞之。恍然有省。遂棲心淨業為人簡默。雖念佛無間。人不知也。年三十餘。家貧。以教讀為業。試前列。無喜色。嘗語所知曰。我之志。固有大者在也。一日小腹忽起一瘤。醫治罔效。瘤潰。血流不止。因賦詩二絕。一云贅瘤還繫贅瘤身。自歎今生半廢人。四大本來無我相。皮囊雖好不多春。一云。不用良方不用醫。自家有病自家知。從今晝夜彌陀佛。證到金剛不壞時。臥病兩月。病苦日劇。念力益堅。臨沒前三日。預知時至。屏家人勿近。至期。請名僧數人助念。跏趺合掌而終。時在嘉慶十九年二月二十三日(染香集)。

沈廷瑜

沈廷瑜。嘉興北版人。性端謹。遇事必躬為之。而信口佛聲。滔滔不絕。人或笑之。皆所不顧也。如是數十年。自云。念佛愈能熟。處事愈詳明。年七十三。示微疾忽語家人曰。佛來也。為我炳燭。手自焚香而絕。時嘉慶十九年三月十九日也(染香集)西史氏曰。念佛愈能熟。處事愈詳明。此真動靜一如。深入三昧者也。營心名利者。動云我處事紛心。無暇念佛。直至生死到來。放下空手。是誰之過與。

施靜巖

施靜嚴。華亭人。性端謹作事問密。為人謀。必盡心。親族多賴之。嘉慶二十三年春。臥病。藥餌罔效。入夏病劇。其表兄鄭慧葊來視。憫之曰。弟病亟矣。何不念阿彌陀佛。經云。臨終十念。亦得往生。靜嚴曰。我恨平日未知念佛。今不能念矣。奈何。遂大哭。慧葊曰。無妨。弟聽我念。心中。觀想可也。即朗唱佛名。靜嚴亦高聲隨誦。纔數十聲。忽曰。阿彌陀佛并諸菩薩多在目前。言畢而逝(染香集)。

張孝林

張孝林。號鹿泉。華亭人。奉佛甚虔。好施與。告急者無弗應。日 誦金剛彌陀諸經。並持佛號萬聲。嘉慶二十三年。晨起。告家人 曰。吾夢蓮華開矣。明年正月某夜。炷香向西。朗誦彌陀經及心經 各一周。復頂禮者三。趺坐合掌。默持佛號。至夜半。含笑而逝。 異香滿室。

先是孝林第四子。名驥鍾。隨父修淨業。施與周急。亦如孝林。自奉甚薄。蔬食終年不厭。事親孝。母死。哀毀骨立嘔血數升。曰父有三兄在。我去矣。即趺坐母柩前。默持佛號。閱三日。捻珠而逝。載入郡志(染香集)。

方剛

方剛。字鐵華。華亭庠生。與蓮生庵主。洵庵為方外交。知念佛法門。由是長齋念佛。精進數年。嘉慶二十三年秋。染疾。自知不起。絕食飲水。命其弟邀洵庵夜話。謂曰。承師開示念佛法門。遵以修行。今我於十五日去矣。感不去心。故相邀一別耳。至期能來一助為望。遂口占一聯云。十念堪憑。休放過臨終一念。眾生可憫。先了却自己三生。屆期洵庵至。剛曰。頃已見大和尚接引。可急焚香。念佛千聲即去矣。眾稱佛名果至千聲。合掌而瞑(染香集)。

潘萬宗

潘萬宗。吳江黎涇港人。中年喪子。發出世心。詣南海佛頂山。求 藏悟和尚薙染。悟公曰。爾有母在。未可也。況修行不在出家。得 一良友。不時熏習足矣。萬宗乃已。晚年。長齋奉佛。下體素患癬 疾。至是忽升頭面。甚重。欲赴水自盡。方外友定川止之曰。疾從 業起。業由心生。如其含怨沈波。則迷根深植。後生益苦。可不懼耶。若能悔悟自責。隨緣忍受。益其進修。則禍為福基。所以經歎修行正念。而臨終尤甚。祇為心力難思故也。萬宗言下豁然。由是念佛愈勤。一載後。疾良已。嘉慶二十四年仲夏時。見淨室門上油雲盤旋。隱露葫蘆放光狀。心竊異之。是年十月朔。示微疾。又三日。沐浴更衣。端坐繩牀。令妻助稱佛號。移時而寂。妻為焚衣。火滅後。灰燼中現三聖像。眉目分明。衣摺畢具。又於招魂日化一襯衫。灰上現大字數十。皆赤色。惜為無知者埽去。遠近歎異。年六十六(染香集)。

沈舒華

沈舒華。號苧茶。錢唐孝廉。自幼敬信三寶。力行善事。嘗刊佛經及諸善書印施。戒殺放生等事。尤實力奉行。中年受五戒。長齋奉佛。專心淨土。日誦彌陀名號五萬聲。數十年無間。晚選甯郡教職。辭不赴。繪趺坐蓮臺圖以見志。一夕五鼓。忽睹室中光明。以為天曉。遽起禮拜。未幾復暗。閱半月。早誦甫畢。覺體憊倦。仍默持佛名不輟。明日晚。合掌而逝。時在嘉慶二十四年十二月十五日(染香集)西史氏曰。古人有鏡光現於壁端者。有月光現於塔上者。往生集謂身心榮徹之明驗。室中光明。得毋類是。

沈虞尊

沈虞尊。震澤麻園濵人。自幼至老。念佛日課。無有間斷。臨終前一日。徧召親友告別。屆期澡浴易衣。出坐堂中。合掌念佛而逝。 卒時室中異香。達於鄰里。年六十七(染香集)。

馬敬修

馬敬修。松江金山縣人。中年好道。與里中同志數人。共修淨業。 行願切實。樂善不倦。戒殺放生。尤為勇猛。會參一和尚。暨松濤 和尚。相與提持。益切求生之願。即受優婆塞戒。苦志數年。後病 頤腫。轉側維艱。然志不稍懈。適松濤和尚來問疾。留之念佛相 助。三日後。自見牀前有金小塔。淩空而下。兼有四色蓮華。鮮盛 異常。乃合掌謝眾曰。導師來矣。連稱佛號而瞑(染香集)。

許仁熟

許仁熟。丹徒南鄉人。性湻厚。父悟誠。精修淨業。仁熟亦篤信三 寶。常誦準提呪。既冠。肄業城中。每得修貲。輒放生濟苦。悟誠 欲為聘妻。辭之。年二十二卦院試。得咯血疾。後數年漸入沈疴。 呻吟牀第。悟誠曉之曰。病乃宿業所招。西方阿彌陀佛。是無上醫 王。汝能往生彼國。萬劫沉疴。一朝脫去矣。仁熟恍然。遂請竹林 **寺雪谷和尚。庭中設座。受三歸五戒。發露懺悔。刻志西方。至四** 月八日。令延僧念佛。以七日為期。期滿。即薙髮披緇。眷屬悲 甚。仁熟曰。爾等速去。勿亂我正念。自此持誦益力。五月一日。 又令延僧念佛七日。遂絕粒飲水。直身仰臥。莫能舉轉。至初六日 晚。謂悟誠曰。今夜圓滿可耳。遂上燈起香。至夜半。忽窗外紅光 燭天。連放二次。仁熟自力轉身。右脇合掌。微笑而逝。年二十 开。

悟誠者。字心僧。有詠道詩偈行世。今錄其四首。一云。心似浮雲 到處閒。本來不住有無邊。黃華翠竹皆真諦。一著研求便落詮。一 云。勤修淨業脫塵緣。不用思維自了然。若是狐疑生識見。密雲濃 霧障青天。一云。談宗講教世滔滔。競說聰明見地高。何似堅修真 實行。彌陀一句斬魔刀。一云。萬劫沈迷悔悟遲。今朝始識路多 歧。幻緣報盡成無漏。七寶池蓮占一枝(詠道詩偈并序)。

淨土聖賢錄續編卷三

往生居士第四之二

裴永度

裴永度。江南泰州人。世居曲塘鎮。耕稼為業。性恬淡無所好。而見善必為。幼即篤信佛法。長齋課佛名無間。既而歸依高旻古光和尚。受滿分優婆塞戒。行持嚴潔。未嘗缺漏。其妻亦信向念佛法門。受優婆夷戒。夫婦雖同居一室。數十年中。履踐純白。人無得而議焉。早年無子。唯一女。亦齋素奉佛。未幾懇求出家。許之。為薙髮披緇。受苾芻尼大戒。永度捨宅為庵。令妻女同修淨業。自則別搆靜室。獨居念佛者數十年。後年近七旬。一日告其親族曰。吾五日後當相別矣。幸以吾遺蛻焚化。此身如幻。勿錯相愛惜也。至期。端坐持佛名而逝。家人從其遺命。闍維。得舍利百餘粒如豆。五色晶瑩。遂貯以瑠璃缾。供奉庵中。時道光初年事也(染香續集)。

鍾九思

鍾九思。杭州人。家西溪。為人長厚。篤信三寶。鄰近僧舍茅蓬數十。九思一一護持。供養不怠。或以事故。虧其多金。亦無怨色。與人交易。無分毫欺詐。婦沈氏同修淨業。九思作諸功德。恒樂助之。一子一女。皆樸素勤謹。道光六年初夏。九思示微疾。至二十四日清晨。告其妻曰。我以平日忠實不欺。淨願肫切。蒙佛菩薩接引。今午當西去。爾等好事。量力常作。其慎守我志也。及午曰。為我然香燭。復謂沈氏曰。爾來日無多。念佛緊要。言訖而逝。年五十二歲。明年七月。沈氏亦示疾。邀其夫兄。將家事交付畢。靜坐念佛。至二十一日。謂子女曰。做好人。洎然而逝。年五十四歲(染香續集)。

周光

周光。字西蓮。江甯諸生。天性純厚。淡於榮利。雖家世貴顯。絕無纨袴習。中年。長齋奉佛。日誦金剛般若經。佛號數萬聲。求生淨土。每朋友相見。寒暄數語外。即提唱淨土法門。諄諄勸勉。集貲重刊彌陀經疏鈔。手自校讐。流通江淮間。耄年。神氣矍鑠。念佛益銳。嘉慶二十二年秋。患疝疾甚危。而執持名號不輟。疾旋

已。人或以此。稱之。則云我於爾時。初亦痛苦難忍。繼想身既是假。則苦亦非真。況身之與心。精麤判然。彼身自痛苦。我無如彼何。我心自念佛。彼亦無如我何。始猶身心角立。漸漸只知有心。不知有身。而痛苦遂絕矣。尋卒。嘗作淨土詩百餘首。刊行於世。一云。早投清泰為捿息。休向濁塵論有無。煩惱熾時徵定力。念頭起處作工夫。尺香勤課三千佛。趁意隨輪百八珠。慈母倚閭虚眼望。可憐逝子尚迷塗。一云。娑婆障道事縱橫。說著蓮邦夢亦清。一息不來千劫恨。寸陰肯捨六時名。如雞抱卵溫相續。似火鎔金鍊愈精。當下情根除却盡。自然真性現圓明(染香集淨土詠)西史氏曰。佛言苦莫過於有身。是故有身即有罪業。有罪業即有痛苦。洵能知身假苦不真。斯返本窮源。罪亡心滅。西蓮其智矣乎。

路坤

路坤。江甯人。性慈善。信三寶。其弟某。服官他處。坤嘗至其署。見廚中日事宰割。惻然傷之。常以因果勸諭其弟。而仍復不斷。坤遂發願茹素。即於署中則舌血。書阿彌陀經。求生淨土。旋辭歸。讀書教子。以道自樂。未幾。子入邑庠。乃令教讀自活。自此不問家事。一心念佛。雖寒暑疾病無少間。與周光交好。常以淨業。互相淬厲。坤體素肥。緣茹素刻苦。日漸減瘦。至晚年。形消骨立。而課誦益密。無時無事。不迴向西方。素喜誦金剛經。每於佛前跪誦。雖困頓俯伏。卷未終。不起也。偶染病垂危。家人為備身後事。坤於恍惚間。見梵僧八人。身皆丈餘。入其室中。舖設壇場。代作佛事。坤方隨誦彌陀經。遽醒。經聲猶喃喃在口。而病若失矣。逾年。無疾而逝(染香集)。

吳允升

吳允升。字常導。徽州歙縣人。少年貿易蘇杭間。偶於虎邱遇一僧。熟視之。謂曰。子頗有善根。惜二十九歲有水戹。當柰何。允升甚恐。求解免之策。僧良久曰。從今以往。戒殺放生。每日虔誠念佛。持大悲呪。或可免耳。允升信受奉行。并常以此勸人。至二十九歲。因歸里道由杭州。於江干附舟。同舟十七人。開行數十里。而潮適至。巨浪洶湧。勢瀕危。忽憶前僧言。急合掌念佛。未幾。舟覆。允升墮水。於昏瞀中聞人語曰。吳允升勸人念佛有功。可免此難。開目顧視。則身已登岸。乃為漁人撈救而出也。冠履盡被水衝去。唯平日念佛十八子數珠一串。猶牢持手中。其同舟十六人。已漂沒無蹤矣。自是益信念佛功德。不可思議。不復還里。於

吳山開相館。謂藉此可與人談因果。自愈精進。嘗然臂香作求生西 方四字。以表行願。杭人承雲棲之遺風。多知信向念佛法門。但從 事者。祇屬老年。每月一日。於寺中念佛。謂之老兒會。少年則 否。會中亦不敢多集人。恐涉異教之嫌。允升慨然曰。念佛之法。 無分老少。佛為正教。我 朝崇尚。乃一一為開導之。是時延公儉 田。方主鹽政於杭。允升與有舊。因募捐二百金為倡。於紫陽山寶 成寺。啟念佛會。每植會期。為諸人開演利益。廣說因果。未發心 者。勸其發心。已發心者。勉其精進。又於城中仙林寺等處。皆舉 會勸化。信從者日眾。每期不下千餘人。率皆恂恂恭謹。絕無喧囂 之習。寺中西方殿。并丈六像。亦是時所重新者。一日清晨。人共 見大勢至菩薩鼻中。放白光如繩。蜿蜒殿庭。逾數刻始滅。自是以 來。杭城念佛之風大行。城鄉之間。互相感化男女老幼。手數珠。 口喃喃者。習見為常。不復詫異。允升之名。婦孺皆知。每值會 期。無不延佇其來。西湖有靈峰寺。伏虎禪師遺跡也。穨廢已久。 允升於道光初年發願重興。經營數載。始告厥成。年六十六卒。臨 終時。正念分明。自言見無數菩薩經行於前。趺坐泊然而化。時在 道光九年五月朔日(染香續集)西史氏曰。路坤念佛。本求往生。而兼 免現牛之病苦。常導念佛。本圖脫難。而復獲瑞應於臨時。孰謂念 佛功德。但利身後乎。顧彼二公者。皆實力奉行。諦信不貳。今人 以少時之力。逞意貪求。不能徼倖於萬一。遂謂佛無靈驗。盡棄前 功。良可慨也夫。

范元禮

范元禮。字用和。錢塘人。幼習儒。履踐篤實。事親孝。父有疾。
封股和藥以進。遂霍然。母余氏病。復封之而愈。迨父母沒。妻隨亡。時甫壯年。慨然卻塵緣。從養真家遊。經十餘年。頗著功效。
後閱雲棲書。有省。遂於雲棲受五戒。壹志堅持。乃至獸毛蠶吐。不以著體。盡棄所習。專修淨土。於觀想一法。尤為精密。先是其母臨終時。彌留瞀亂。元禮勸以專心觀想觀世音。其母從之。如元禮
四次之之,以善,以
四次之,
四次之

非如楞嚴五十種陰魔之謂耶。若作奇特。將受羣邪。且念佛者志在 西方。聖境不現。奚以此為。遂時時覺照。正念現前。嬰兒乃不復 出。從此於唯心之旨。深有契悟。信行願力。愈加純摯。常語人 曰。此乃生平第一險關。少不省覺。便墮旁門。以知修行不可不慎 也。十一年夏。養靜於清泰門外寂照寺。其地有瞽目沈嫗。志念 佛。而為媳所阳。元禮聞之曰。是可轉也。彼所患者貧耳。若助以 資糧。自當無辭。遂入城。為募月米數斗。嫗取給外。有餘則逮其 媳。乃歡然不阻。元禮復為演說念佛利益。并教以懺悔發願。閱數 月。其鄰人來告曰。曩者念佛老嫗。生西去矣。問其由。具言自得 供養後。如何精勤念佛。如何懺悔發願。至某月。預知去期。以告 媳。及期。沐浴更衣。合掌坐逝。曾遺言致謝范公。唯尚無棺殮。 媳將賣女營辦。奈何。元禮即謀諸善友。得殮資若干。交其鄰人持 去。旬日後。元禮詣其家訪之。至則有手數珠。口喃喃持佛名者。 其媳也。一見元禮。歡然迎謝。甫坐次。其鄰舍人屬至。爭欲識范 公面。游交口為述老嫗近事。一如向者鄰人之言。復指一幼女曰。 此即蒙恩免賣者也。問嫗安柩在。則曰自棺殮後。鄰里共議。彼城 中人。尚肯遠來作善。我等鄰舍。豈可坐視。遂集貲買地。并其子 久停之棺。同日安葬矣。元禮欣然歸。是年冬。其所經紀善事。促 了之。明年正月。法侶所。以次過從。殷殷敘談。若將遠別者。其 子有松江之行。語之曰。汝出外。好自作務。吾年老。倘有變故。 慎勿倉皇。遽拋正事。負人委任。其子領之。謂是老年人過慮語 也。至二十四日。早起。謂家人曰。今日殊覺氣急。然又如常食 粥。粥後。復詣鄰舍盤桓刻許。歸家。則就堂中端坐念佛。姪輩有 問。搖手止之。至午。氣漸微。遂終。次日酉時入殮。其頂猶溫。 年六十三。時在道光十二年(染香續集)西史氏曰。觀用和示子別友。 先期了結諸務。不可謂非預知時至矣。然則何不明言之。曰。所貴 預知者。貴其自知。以穩心地耳。非圖稱美於人也。況至時而善友 齊臨。或有助道之益。設使眷屬圍繞。涕淚哭泣。豈非欲成反敗 耶。和之不言。良有以也。

孫復元

孫復元。字敏斯。仁和庠生。性慈善。幼喜讀感應篇陰隲文。立願 遵行。所居與屠肆相對。一日晨起。見屠豕。遂發願戒殺。買豬放 雲棲。雖不能斷肉食。而常茹素。蚊蚋蚤蝨。亦不偶傷。壯年後。 日課佛號金剛經大悲懺。兼記功過格。甫二載。夜行無燭。目前輒 有光明。愈自奮勉。行諸功德。尤以濟貧放生為急務。事無巨細。 皆盡力為之。嗣因襄理鹺務。塵擾紛紜。夜行光明漸隱。乃矍然 日。吾自誤大矣。遂辭歸黽勉如前。光明復顯。益信感應不虗。念佛觀想。一意西馳。數十年無間。七旬外。彌加精進。屢感瑞應。或夢大星如盌。燭照己身。或夢長跪白蓮。對佛持誦。一夕纔就枕。聞人語曰。德由己積。福自天來。開眼無所覩。而語音歷歷在耳。道光十二年二月二十一日。正禮拜時。恍惚見一披袈裟者。立於蒲團前。頂禮時。首著其衣。及舉首。則又見其據高座。越三日。覺精力憊倦。臥持佛號。牟尼妙相。復現於窗牖間。至三月二日早起。神志怡悅。隨意行坐。略無病態。迨晚。諭家人曰。明日為我買螺螄二擔。鱔鰻數百斤。散放河池。且曰我死。汝等務須念佛放生。力行善事。勿忘此語。時方坐繩牀。即燈下握管。親書放生文疏。字畫端楷。無少舛錯。書畢安臥。微聲持佛號而終。年七十五(染香續集)西史氏曰。觀想功深。而屢感瑞應。宜矣。至其聞人語於虗空。覩聖容於禮拜。雖云一誠所感。不幾鄰於魔事乎。姑錄之以俟有識者正焉。

張清新

張清新。字六華。金山附貢生。少孤。事母孝。及長。徧遊名勝。 樂與方外交。名利淡如也。年三十餘。歸依軼羣靈公。法名真倓。 旋禮豁然開公。奉葷酒戒。長齋念佛。戒殺放生。一門眷屬。咸欣 從事。晨夕佛聲浩浩。三十年如一日。所居洙涇鎮。皆熏其德而善 良。暇則手數珠。稱佛名者比比然也。清新嘗於崇福寺結淨制二七 日。解制後。朝山禮海。徧參諸識。心性益徹。勵志西歸。以其餘 閒。著薝蔔居詩集若干卷。與佛旨相契。道光十一年冬示微疾。命 子詣崇福建水陸道場。明年五月。病劇。曰。吾三日內當西歸。眷 屬等勿得悲惱。命請洪基和尚至。令家人同聲念佛。至初四日。沐 浴趺坐而逝。頂援一晝夜。壽六十二(染集續集)。

丁繁桂

丁繁桂。字小山。金山庠生。自幼攻舉子業。不談佛法。亦不毀謗。唯父母欲為聘室。決志不從。曰。吾行吾志也。所親或伺察之。乃知其密行淨業已久。向者特不露相耳。道光十二年夏。陡發血症。延至八月十六夜。忽微笑。謂父母曰。報緣已盡。吾得西方去矣。朗誦佛號千聲。而絕。年二十二(染香續集)。

李勤

李勤。字香臺。仁和人。生而醇厚。與人無忤。頴悟好學。經史子 集靡不周覧。顧淡於名利。無意進取。思出世籠。從元學家遊。志 意清潔。皎然不污。中年後。信向佛乘。受在家五戒。法名妙淨。 由是進修縣密。於宗門中事。頗有省發。而特以淨土為歸宿。嘗 曰。一知半解終歸無濟。吾寧守穩當法。不敢大言自欺也。勤家故 不豐。而布施罔惜。且能不矜不伐。於三寶中事。尤極意尊崇。嘗 鐫旃檀佛像。及金剛經塔。互碑二座。立於海潮寺中。工費不敷。 則質典以足其數。繼又鐫極樂世界全圖一碑。以志信願。一日因齋 僧宿寺中。賊乘間踰垣。入其室。天明方覺。門戶洞啟。竟未失 物。信為鬼神呵護。國清寺鑑堂和尚。為近今叢林傑出。早卒於 杭。有遺稾一卷。勤收拾而刊傳之。初未嘗識鑑公也。道光十二年 夏。其姪女杏姑。病將革。勤日夕顧之。提其正念。卒能念佛化 去。未幾。勤亦病。醫者曰。是積勞傷氣所致。宜善靜攝。不爾。 恐益深。醫去。勤曰。是正令我取小失大也。烏乎可。愈精勤念 佛。并手了一切功德事。至十月。病劇。十一日中夜。趺坐持佛 名。泊然而逝。先是三日前。向家人索僧帽一頂。急製與之。遽戴 頭上。喜曰。縵衣吾固有之。所少者此耳。今得頂戴。以觀彌陀。 吾願足矣。幸即此成殮。以遂吾志。次日就木時。所親試啟帽視

張惇五

張惇五。一名爻泰。字敘堂。長洲學附生。晚年篤信淨業。與善慶庵德公習。久之淨業益純。持長齋。後因年高減食。長女勸開齋。少女曰。小孝無益。以是作往生券。可矣。未幾。少女抱病。病中絕不念佛。惇五訝曰。病重力劣。誠可懼也。吾可不自省乎。乃日課佛號十萬聲。一日忽謂德公曰。緩急之秋。非時相招。幸必援我。越數日。夜扣德公門。欲延淨侶數人。德公意謂惇五並未有疾。必其女逝。先遣數僧去。德公繼往。則惇五已趺坐逝矣。踰旬。其女亦念佛而逝。始知其病重不念。正以勵其父之努力也。時在道光十四年(西歸見聞錄)西史氏曰。全父齋戒。激父勇猛。成父往生。孝之至矣。少女固善於啟發。敘堂亦樂於信從。敘堂沒而少女隨逝。豈非因緣會遇。乘宿願而來者哉。

曹諧和

曹諧和。法名廣智。字聲五。江南上元人。業染絳於蘇。家焉。道光七年秋。延夏文榮視其妻病。文榮教以淨土法門。從之。既而疑

焉。謂文榮曰。人說君以念佛誑人。何故。文榮曰。誘人以惑業受苦果。輪轉三塗。是流落他鄉也。謂之誑可。勸人以戒定慧往生極樂。究竟菩提。乃勸人歸家也。何誑焉。諧和言下有省。問如何可以歸家。曰。持戒為基。作福為助。執持名號。到一心不亂。是歸家消息也。遂欣躍而去。既歸依杯渡海公。明春受五戒於靈鷲義公。一夕忽夢黑山在前。欲上而溪水隔之。有紅日西沉之象。遂醒。悟塵緣將盡。功益進。家資三千金。不數年而布施罄矣。十四年四月。以資罄輟業歸。先是諧和勸母修淨業。母以其無子。命之納妾。謂母曰。願母同生淨土足矣。五濁多造業事。嗣續可不計也。既而奉母還鄉。未幾其母念佛而逝。是年六月。諧和示疾。越六日亦念佛安坐而逝。其女見之。發深信心。念佛四十九日。吉祥坐脫(西歸見聞錄)西史氏曰。百日之內。亡其三人。在世俗豈無物議。而一門眷屬。同託蓮胎。實堪慶幸。此誠可為知者道。

潘遵懋

潘遵懋。字意蘭。吳縣人。小業賈。丱角後。即歸心佛乘。修淨土 法門。力行之。日有程課。仁慈好施。恤孤窮。護生命。飯僧修寺 諸功德。無不隨喜。平居自奉。泊如也。年三十。得咯血疾。乃發 心刺舌血。書法華經。經畢而疾閒。自是屏絕塵累。專心禪誦。一 室之內。鑪香餅水。蕭然寒衲。日與家人輩說無生法。每風日晴 美。出遊名藍蕭寺。與一二禪慧。結林下契。善慶德公尤所莫逆。 嘗隨德公詣鄮山。於阿育王塔前。設涅槃供。獲賭舍利瑞相。臂香 翹敬。求牛安養。道光十五年春。舊疾復作。自知不起。語德公 曰。病亟矣。立意作西歸計。願諸淨侶。日來我家。為我助念。我 以持名切故。能兩三時不起雜念。唯不見佛來。奈何。自恨障深緣 淺。痛哭責勵。淚涔涔下。德公多方開示。越日。謂德公曰。西方 有大白光來。照我身心。樂不可言。持念益切。一夕夢遊蓮池境 界。莊嚴勝妙。如經所說。明日忽起。曰。見佛無數。徧滿虐空。 我以念力勇猛。得中品生矣。寄語同學。努力進修。早來淨土。毋 自阻也。合掌念佛而逝。家人得其日課之簿。持經念佛。按日登 記。葢二十年如一日云(僧覺阿撰潘意蘭傳)。

宋萊

宋萊。字望山。蘇州人。年六十餘。聞淨土法門。日持佛號數萬。 曰。我憑仗六字。了當一生矣。後館錢萬里橋江氏。館主以其持齋 念佛故。禁之不可。遂辭之。已而移席他所。師生相得。謂其徒 曰。學堂甚好。我設終於此。可乎。一日學徒入塾。見萊方合掌念佛。頃復入如故。即之逝矣。硯下得一紙。葢三日前所書期也。室有異香。經宿不散。事在道光十五年(宋梅浦述)。

周慶孫

周慶孫。字雲田。蘇州國學生。事母孝。娶曲阜孔氏。既而孔氏招之。將為之援例得官。率其妻子往。舟覆於河。妻子俱死。慶孫僅以身免。遂意絕進取。奉母家居。虔修淨業。自號夷白居士。為人謹而葸。戒恐破。不敢受。齋恐開。不敢持。經論畏深。不敢閱。時鐵君定公與慶孫善。謂曰。佛門修持。當不知足。君如此自餒。幾生能了生死耶。慶孫默然。一日忽到定公處。投地頂禮曰。今日始知君之善也。近閱藏經。獲無量妙益。決意長齋矣。持名亦甚得力。微君則不及此。精進數載。道光十五年八月望。早啜粥一盂。箸忽落地。無疾而終。僧覺阿在朱涇即是菴。於是月下旬。忽夢張惇五及慶孫。慶孫不言。惇五謂覺阿曰。我竭力僅能到西方耳。不及渠品位高也。醒而異之。九月。其弟到庵。覺阿述其夢。始知慶孫之已卒也(西歸見聞錄)。

陳居士

陳居士。遺其名。常熟人。世英茂才之從父也。平日晨起。爇香默然。誦經課佛。家人莫之知者。葢密行也。風雨寒暑不間。歷有年所。道光十五年七月。自言九月二十三日西歸。家人以其無疾。弗信。及逝之前三日。示微疾。而起居如常。至期坐脫。家人環呼。乃開目略數言。旋曰。吾行矣。遂瞑。異香發自毛孔。既殮。室猶三日香也(往生近驗錄)西史氏曰。修密行者。蘊釀必深。體發異香。所以顯之也。

余邦賢

余邦賢。紹興人。少業賈。年六十餘。輟業與妻同修淨土。念佛之外。嘗各禮華嚴經八部。道光十八年。年八十六矣。妻先示疾。邦賢亦病。一日妻謂其媳曰。為我辭汝翁。吾欲行矣。媳訝之。以告邦賢。邦賢曰。姑緩三日。可與同行。妻聞曰。諾。果至三日。同時化去。時為六月二十三(朱寅堂述)。

吳宗魏

吳宗魏。字秋亭。元和人。父濂。修淨業往生。事載本傳。母周氏。故有肝疾。宗魏侍奉極孝。病劇。刲股以進。疾旋已。既而母歿。宗魏於七七日中<mark>刺</mark>血。書地藏本願經。遂歸心佛乘。宗教兼通。諸方老病。亟稱之。已而專修淨土。自號一如居士。長齋受五戒。於寄葉庵結蓮社。其於放生施衣捨槥諸善事。皆盡力助行。一日示疾。自知不起。遺書諸道友。一以淨土相勗。自謂平日功夫。病中祇存一半。有退無進。甚難甚難。諸君子切切謂我平日且作世事。待病時用功。悔之無及。自誤不小。其沈痛若此。歿之前一日。其友錢文燦省之。問念佛否。時宗魏言已艱澀。索筆書曰。死苦如是。往生願力愈堅。翌日遂逝。遺言不焚衣。不接煞。不繪遺容。時道光十八年七月二十六日(吳今帆述)。

張齒延

張齒延。常熟國學生。素善飲。自命不凡。聽人談及佛典。即聲色 俱厲。一日偶閱因果輪回之說。忽明牛死大事。遂戒殺屏飲。日持 金剛經。大悲呪。佛號。回向生西。懺悔病業。已而斷葷血。時方 患風疾。右體偏枯。有勸食肉調養者。笑謝而己。道光十九年春。 手書普門品數冊。刊印散施。謂人曰。苦海慈航。勿覿面錯過也。 是秋。夢吞蓮華。自是益精進。告其弟爾旦曰。吾誦普門品。須滿 一萬二千。方酬我願。爾旦詰其故。太息曰。世間四苦。生老病 死。吾歷其三。所未可預剋者死耳。然亦駸駸迫矣。可弗早備資糧 耶。二十年正月十一夜。爾旦臥不成寐。聞齒延誦普門品。聲琅琅 然問之。則齒延正在熟睡。並未出聲。葢夢中誦也。明日晨起。常 誦畢。以事往姻戚家。忽痰湧塞喉。急送之歸臥牀不醒。十三日 晚。其友謝鳳梧來視疾。令爇香然燭於榻前。以其平日數珠授之。 手忽舉。掐珠至胸前。目光上燭。舉體皆動。而氣遂絕。眾決之 曰。此善逝也。必生西方。獨妻不信。向棺祝曰。果爾。當於夢中 相報。越五日。夜夢有人傳語曰。勿哭勿哭。汝家此人。已往越十 萬億佛土矣。醒而異之。然平生未誦彌陀經。不知十萬億佛土五字 為何義。次日問諸大眾。始知其夫往生。有明驗矣。爾旦。字眉 叔。亦修淨業。刊往生近驗錄行世(往生近驗錄)。

金庭棟

金庭棟。字友蘭。蘇州人。篤修淨業。道光二十年冬。得疾。自知將終。邀其歸依師亮寬和尚。及善友數人來。告之曰。吾生死將判。願諸公助成勝緣耳。眾舉聲唱佛號。良久曰。此時吾目前所現

之地。皆七寶合成。然踏之柔輭。耳中所聞之聲。則微妙難狀。且極西見金色八字甚分明。一友正之曰。汝誤矣。今所誦者六字耳。庭棟以手指曰。極樂世界阿彌陀佛。非八字耶。又久之。合掌告師曰。弟子行矣。遂逝(往生近驗錄)。

徐僖

徐僖。字夢白。吳庠增廣生。少遊黔滇。攬江山之勝。胸襟曠如。 舒淨十文攜贈。遂信奉佛乘。更號夢蓮。茄十齋。立淨課。矢願往 西。詣尊勝庵。歸依亮寬和尚。法名如超。六旬餘。業益專。依靈 **鷲義公受菩薩戒。時城中盧師庵。方募建大涌閣。僖極力眥助。道** 光二十一年夏。忽清釐家。務謂家人曰。人生七十。已慶古稀。吾 七十有二。今秋殆必歸矣。著反本瑣言數則。誡臨終諸事。一則 云。人生如寄。生必有死。死固人之常事。唯妻孥兒女情長。以為 從此永別。不禁痛哭哀號。殊不知全受全歸。令終為福。且吾輩既 修淨業。正欲脫離苦海。直往樂邦。所望臨終一心不亂。庶可如願 往生。若聞哀哭之聲。必至為情愛所牽。寸心散亂。則平日之修 持。都屬無用。是眷屬之愛吾哭吾。適所以惡吾害吾矣。切記於氣 將斷絕時。各人助吾念佛。不可混叫亂哭。須俟瞑目一二時。方可 舉動。易衣轉屍。寧遲毋速。昔邵康節先生父伊川丈人。臨終謂家 人曰。侯吾就殮方哭。勿急叫號。俾吾失路。語見康節外傳。是可 法也。又作禪淨四料云。念佛不參禪。老實做鈍漢。念到佛即心。 勝把話頭看。參禪不念佛。直須桶底脫。倘有一點疑。盡頭難著 力。念佛復參禪。是二即是一。參念要膠黏。否則易放佚。不念亦 不參。得法可捨法。若未到岸時。欲渡苦無筏。其年秋。果遘疾。 日邀僧人善友。到家念佛。牀前供像拈香。自七月二十一日起病。 至八月二十一日帀月。粒米未進。但飲水漿而已。延醫進藥。堅不 服口。疾革時。合堂朗念而浙。 妻嚴氏。平居亦持呪課佛名。年七十三。下痢。臥牀不起。素患耳 聾。一日忽聰聽。身中痛苦俱絕。其子立方。以西方之說進。曰。 余固時時念佛。未嘗廢忘也。至夜二鼓時。謂家人曰。我天明去 矣。遂起坐。朗念輪珠一串。至力竭不能支。復就寢。迨天明。

錢萬鎰

本瑣言徐稼甫述)。

曰。時至矣。復起坐合掌。立方勸直往西方。決然應曰諾。遂終(反

錢萬鎰。字翼山。常熟人。居梅里鎮。世業酤。己而戒殺修淨業。 力改前行。膝下止一子。病瘵。念佛而終。旁人誹笑之。萬鎰奉佛 如故。一夕店屋失火。望空祝曰。吾業應焚燒。願勿傷鄰舍。撲滅 後。鄰果無恙。初萬鎰勸母吳氏。長齋念佛。母從之。旋復自斷葷 血。然餘習未除。善飲酒。其至戚謝鳳梧勸戒。力除之。道光二十 二年春。妻亡。處之淡然。有勸續娶者。萬鎰拒之曰。有子而殤。 續復何為。且吾志在出世。豈屑屑於嗣續哉。是年夏。患咯血疾。 念佛加勵。生死心益切。至七月初。病劇。進食輒叶。鳳梧往視 之。告以古德斷食見佛之事。欣然曰。有此大便官事。吾當勇為。 即於次日盥沐。詣佛前拈香發誓。持七日齋。出貲放生。求生淨 土。日夜念佛不輟。渴則噉瓜而已。人問徹夜不睡。得不疲乏乎。 曰。利其不睡。得多念佛。我無病時。不得安閒。今病得閒。正好 著力。何疲乏之有。及七日期滿。神識瞀亂。進以薄糜。即苦脹 悶。久之。瞀亂益甚。大懼。合掌枕上。命然指。鳳梧曰。君此時 發此願與然指同。不如一意西方之為愈也。遂閉目念佛。初若勉 強。用力猛勵。神志安定。復得助緣者十數人。書夜佛聲相續。初 十日晚。自言見一人至牀前。令瓜果俱勿食。問之曰。吾上界使人 也。言訖不見。明日。忽見西方三聖光明相好。住立於前。欲涌身 入金臺。聞空中聲言。汝身未淨。即命香湯沐浴。浴畢。三聖現前 如故。又謂家人曰。吾已遊淨十。見無數蓮華。吾坐其中。樂不可 言。復自指身曰。此非吾身也。十二日清晨。告其母曰。佛盈室 矣。面西趺坐合掌而逝。年三十八(謝鳳梧撰錢翼山傳)西史氏曰。遭逆 境而初心不退。纏疾苦而正念堅持。卒乃瑞鳳金臺。神遊蓮域。其 高登品位也無疑。嗚呼。勇矣哉。

華漢槎

華漢槎。字以傳。蘇州人。年七旬餘。遇善士蔣文勳。開示念佛法門。且招之供養。信心篤實。歸依在經茂公。一日禮佛時。條見蓮華。徧滿虗空。自是念力益純。道光二十四年正月十九日晚。課佛名至夜半。聲不絕口。人詰之。曰。將往西方。明晨。自著衣冠。欲往蔣文勳家辭別。因天雨而止。人以其無疾。不介意。頃入視之。趺坐合掌逝矣(楊藕槎周尚文述)。

方步瀛

方步瀛。字小湘。崑山人。善書畫。多藝能。既習扶鸞術。神教誦大悲呪。從之。每晨起。定課數十編。已而遇張爾旦勸修淨土。始

專心西邁。一日示微疾。起居如常。向晚謂其僕曰。吾逝期在明日。汝慎勿告女主。僕曰。吾不以告。恐事後有怨。曰。設有怨。汝言生死之事。非他人所可預知也。僕頷之。明日。有友過從。步瀛延之坐。曰。為我誦彌陀經。友曰。吾未習學。如何。步瀛取經授之。曰。吾教汝。遂從容誦經終卷。纔舉佛號。目光上燭。掀髯微笑。趣視之。已化去矣(汪石心述)。

朱麟書

朱麟書。字文泉。新陽庠生。年近五旬。遘危疾。生大怖畏。遂棲心內典。手不釋卷。常以勸善諸書贈人。志存利濟。時亮寬和尚自師林退院。住尊勝庵。有梵行。麟書歸依受五戒。法名如因。結社尊勝。月一集。禮四明懺法。與社諸人。互相策勵。講演淨土法門。後兩目矇矓。不能看書。而課誦益勤。行住坐臥間。默誦西方佛號不輟。年七十。示疾數月。臨逝前數日。夢寐中見白光。述偈言三首。一云。一入塵勞名利牽。忙忙營逐不知愆。室人交謫怨盈耳。生計無聊度老年。樂道安貧知有命。存心養性俟諸天。隨緣應世了前業。幻境空華任變遷。一云。旅泊他鄉七十秋。升沈變態豈無由。回頭覺岸徑歸去。不變隨緣自在遊。一云。業報今已盡。自性幸不迷。踏著無生路。引心已到西。及革。起坐念佛而逝。氣絕逾時。掌猶緊合不釋。時在道光二十五年冬月(郭仰山徐稼甫述)。

陳鍠

陳鍠。法名廣聲。字西堂。嘉興石門人。業賈蘇州。長齋奉佛。為人鯁直。歸依杯渡海公。復從靈鷲義公受五戒。日與朱麟書結念佛。社於定慧寺。雖冗忙不輟。道光二十五年十月。下痢。至初六日。有友談雲屏往省之。鍠曰。子來恰好。我明日一早欲行。為我往小普陀。邀朱寅堂作別。時寅堂以路遠時晚。不至。復顧其弟曰。汝學醫。試為余診脈。自後凡衇象似此者。不可再示方也。頃之從容念佛。至夜半。聲漸厲。人問見佛否。曰。見大和尚。特遠耳。迨天明。泊然而寂。年五十五。越四載蘇州有薛紹基者。鍠在日。常主其家。勸之念佛。後亦發心信行。年六旬。疾篤神識瞀亂。忽作鍠口音云。此刻緊要。何故不

念佛。且須向西臥。紹基遂自舉轉。家人往視。宛然是鍠聲吻。頃之。紹基念佛而逝。此道光二十八年三月中事也(錢安軒朱寅堂述)西史氏曰。藉助緣而往生者。屢聞之矣。至若沒經數載。而乃念故舊

57

之深情。顯靈蹤而接引。斯誠極千古之異事哉。

郭觀光

郭觀光。字尚賓。一字仰山。蘇州元和人。為人醇謹。業醫。不與人計利。病者招之輒往。中年奉西方教。從杯渡海公受歸戒。法名廣仁。每晨起。靜埽斗室。默誦佛號。寒暑無間。祖遺有魚蕩一所。在陸墓北蕪塘。租人捕魚。為祭埽費。觀光再三向族人商議。解囊金代之。請示勒石。捐作放生河。活生靈無算。常與家人言。己酉八月有凶。道光二十九年。歲次己酉。春間病篤。家人為之恐懼。觀光搖手曰。勿慮。木樨香未聞。余命未絕也。至八月。復病。命延僧唱佛。初五日。家人問逝期。觀光豎二指。至初七日晚。合掌而逝。頂上煖氣勃發。良久乃散。年五十六(郭辰生述)西史氏曰。余識仰山於談道會。和藹之風。溢於眉宇。及叩其淨業之修。余固決其必定生也。而卒能不出所料。其化族捐河一節。不尤足多乎。

總論曰。古今來。才人傑士。講道論德者。不少概見。求其臨逝安 詳。現諸瑞應。則什百千萬中。未有一人也。獨此念佛往生之人。 或聞異香盈室。或見化佛迎空。種種休祥。未易悉數。而世之顛倒 凡夫。不此之警覺。反自附於儒者之列。毀之斥之。卒至沈淪於苦 海中。而莫之救也。悲夫。

往生雜流第五

吳生

吳生。杭州人。祖父俱庠生。 大清順治初年。大兵圍城。父母失散。生被掠。送張將官標下服役。時年方十三。自歎吾本儒家子。今下賤若此。必是宿業。遂於佛前立誓。持齋念佛。日誦金剛經。回向生西。年十六。本官發糧充丁。即將糧銀買香供佛。跪誦阿彌陀聖號。至十四年十月二十二日。忽告本官。欲往西方。本官不信。訶為妖言。次日。又到提督前乞假。提督怒。批本官捆打十五。毫無怨言。又向各營作別。自限十一月一日歸西。是日五更。沐浴焚香。禮佛畢。仍至本官船上叩辭。本官大怒。遣兵迹之。見其西向三拜。端坐說偈曰。身在營中心出家。身披鎧甲是袈裟。刀利見彌陀佛。箭箭射著白蓮華。偈畢。自吐火。焚其軀。合營官長。皆遙望羅拜。本官合門齋戒(蓮藏)。

沈承先

沈承先。崑山人。住宣化坊。業木工。年七十餘。持齋念佛。專修 淨土。手不停斧斤。而佛聲亦不絕口。康熙十年三月。預知時至。 三日前。徧別親友。謂將往西方。此後不復相見。告家人曰。明日 十五。當行矣。明晨。澡浴易衣。向西趺坐。取一淨几置前。焚香 念佛而終(西歸直指)。

周絢堂

周絢堂。潛陽人。始辦事公門。既而勘破世情。立除澆惡。靜坐一室。誦白衣呪。持齋放生。廣行方便。見貧而無歸者。隨力救護。後遇旵莊道人。勸修淨土。遂銳志念佛。六時不懈。并轉以教友朋。從中多信向者。曾刻極樂津梁。廣為施送。乾隆五十一年春荒。邑中募賑粥糜。絢堂殫精竭力。晝夜從事。一日五鼓忽起。索浴更衣。謂妻子曰。吾生西時至矣。汝等勿效世俗。但一心念佛。言畢。端坐而逝。略無一語及家事。是早。猶有人見絢堂在粥厰中。往來撿視云(蓮宗集要)西史氏曰。絢堂既已往生。何以復在粥厰。意者慮人疑謗。故示奇蹤耳。其願力之宏。不益見哉。

姚生

姚生。為長洲縣役。家貧。聘妻卒。不復娶。役事讓諸人。寺院中事。竭心力為之。為人正直。能面斥人過。夜定必坐。持佛號萬聲無間。年二十餘。以疾卒。端坐而逝。香盈室。頂如灼也。鐵君定公贊以詩曰。醴泉及芝草。本無根與原。居士西方來。廣度諸有緣。緣盡便歸去。脚跟絕牽纏。斯人難最得。高望長睪然(西歸見聞緣)。

宋寶官

宋寶官。華亭人。家貧。賈醬度日。事母孝。奉養甘旨。不諉昆季。聞人說淨土法門。遂篤信遵行。一日告其母曰。母有兄在。兒 將西歸。即念佛坐逝。時在嘉慶十六年(染香集)。

陳德心

陳德心。字大坤。蘇州農夫也。夏日納涼。偶遇村館。見敬信錄。 乞塾師講解。有省。沿街收拾字紙。彭二林居士聞之。招入文星 閣。勸修念佛三昧。德心素不識字。奉教靜篤。後漸能書。未幾。 為蘇郡妙濟堂司放生掩埋等事。每見髑髏。頻生嗟歎。悟世非常。於是念佛益勤。終身不娶。年六十九。身健如常。忽自知時至。走別親友。至期。於堂中寂然閉戶久之。同事推門入視。見案上供佛一尊。雙燭輝煌。香烟滿室。德心面西坐逝矣。時嘉慶十八年八月望日事也(染香集)。

東門匃者

東門匃者。住松江明星橋。一破屋中。日向市門誦心經一卷。乞一錢。與之則連聲稱謝。訶之亦不介意。但足供一日糠[禾*乞]。即闔扉念佛。蔡西齋方伯異之。親餽錢米。欲葺其廬。匃者卻之。西齋曰。我所施皆廉俸。豈盜泉乎。匃者曰。素知公操守嚴潔。我懼為衣食房屋移我素志耳。無己請為公飲僧。即攜所贈往東禪修供。已則仍歸破廬。念佛如故。嘉慶中。無疾坐脫。里人葬之桃華庵後(染香集)。

癡頭道士

癡頭道士。姓王。直隸人。極愚。親亡乏食。困臥敝廬。無所為計。或與之錢。亦莫辨數之多寡。京邑陳道人收為徒。令日埽地拾柴。晚則課彌陀佛號數百。禮拜。炷香為度。癡頭誦佛不成韻。每昏沈欲睡。道人以長竿擊之曰。汝愚昧若此。尚不知精進耶。如是者三載。一夕呵呵大笑。道人復擊之。癡頭曰。今日打我不得矣。詰其故曰。師枯坐十八年。不知修法。若能如我老實禮念。早生西方見佛矣。道人奇之。而莫測其所謂。翌日癡頭登峭崖。西向合掌。屹立而化。闍維得舍利二粒(染香集)西史氏曰。道士往生。古傳罕聞。今癡頭以愚昧之子。為千古特出之人。而黃冠者流。則曰我學神仙。念佛乃愚夫所為。豈非反被聰明誤耶。

周耀發

周耀發。蘇州伶人也。為演劇。不唱淫辭。暇則默誦佛號。家中絕宰殺。晚年。念佛禮拜。益勤謹。額間成叩印。且逢人即勸。優伶中。間有為其所感發者。年六十六。示疾。臥牀月餘。念佛不輟。一日忽令妻子掖起。曰。吾欲行矣。為我取滌腸湯來。妻子不解。問之。曰。淨水耳。遂飲水一盞。腹中滃然作聲久之。令家人稱佛名。端坐向西。隨誦數聲。合掌而終。移時。鼻筯下垂。長尺許。久之方隱。事在道光六年十一月(錢安軒述)西史氏曰。篤信念佛。固

佳矣。但未知其回向淨土與否。往生未可定也。第其端坐向西。從 容而浙。即不生。不遠矣。

瞿晉槐

瞿晉槐。常熟人。素不信佛。以求生西方為大愚。道光十七年三月。病咯血漸劇。服藥不效。忽夢神告曰。汝之病。唯孫姓者可治。醒而憶及戚友中有孫旃林。延之診衇。旃林曰。病深矣。投藥不過盡人事。君能念佛回向。即是妙方。否則非吾所治也。晉槐遂持佛名。忽謂家人曰。吾今戒殺。為我買生命放之。且曰。今悟矣。當詣和尚處受戒。以懺宿業。然獨言獨語。從未有與之言此事者。及卒前兩日。以家事屬母。料理積逋。若將遠行者。至四月十四日。強起憑几。忽仰首若有所見。急稱阿彌陀佛。連唱十餘聲。首俯而絕(往生近驗錄)西史氏曰。或疑晉槐既已緣熟。神曷必藉口於孫姓。噫。佛世一城人難化。獨與目連有緣。寧不聞之乎。

孫松亭

孫松亭。錢唐人。素奉斗。道光十七年秋。病亟。見旌蓋輿馬來迎。謂人曰。吾從之行矣。其季弟又村止之。曰。此鬼神趣。非大善處。不可從也。良久曰。若輩悉滅形矣。吾將安歸。又村以淨土法門進。松亭奮然。欲誦佛名。而舌本強澀。格格不能成六字。又村助誦之。始琅然出聲。至千餘聲乃寂(往生近驗錄)。

陳畫叟

陳畫叟。紹興人以善畫遊滇。家焉。長齋奉佛。歷數十年。鄰有善女人。為叟所敬服。有疑必諮。習為常。道光十九年夏。年六十餘。忽厭齋素。臨飯減食。且漸形聲色。子婦邀其敬服者。來相勸勉。遂愧而自責。曰。余為舌根所誤矣。謂家人曰。今後供饌。勿問余隨緣而已。又何擇哉。由是仍復如常。一日忽命設祭於寢。子婦異之。曰。余將西歸。與先靈別。無他故也。問其期。曰。三日後。從之。至期晨沐。衣冠西向趺坐爇香。朗誦佛名。顧子婦曰。尚有屬付。可邀鄰女來。家人佯諾之。而未往。叟顧日影。太息曰。緣止如是。吾不欲久稽矣。遂合掌而終。此事范西民孝廉在滇中。得於鄰女所自述者(徃生近驗錄)。

丁童子

丁童子。常熟人。居梅里鎮。七歲時。聞其父母持佛名。亦每朝持之。未幾。有微疾。晨臥。忽蹶然興曰。今日未課佛名。自誤大矣。遂盥漱禮誦畢。復就寢。至晚。告母曰。吾隨佛西去。願勿驚訝。乃連誦佛名。良久暈絕。母出不意。猶望其蘇。聞喉中作聲。若欲有言。喚之不應。忽大聲稱大慈大悲四字。遂絕。次日就殮。舉體皆冷。而頂則尚煖也(往生近驗錄)總論曰。或疑雜流往生。純是淨土聖賢隨機化導。言雖近理。而畫地自限者多矣。觀是錄中。若皂隷。若伶人。若勾者。乃至闡提外道。但得發心。都能成就。猥曰下愚根鈍。不足以及上智乎哉。

淨土聖賢錄續編卷三

淨土聖賢錄續編卷四

往生女人第六

田婆

田婆。泰州野田莊人。夫婦俱信三寶。造像放生。齋僧布施。其夫 日誦法華經。婆獨念佛。如是二十餘年。婆忽於順治十四年八月二 十三日。向子言。可將二妹領回。我今日西方去矣。子從之。家人 都為淚下。婆說偈曰。五十六年大事畢。丈夫兒女休啼泣。我今撒 手往西方。摩訶般若波羅蜜。端坐而逝(蓮藏)。

蔣氏

蔣氏。興化縣東鄉人。年四十。夫亡。葬畢。向子泣曰。無常到來。莫能替代。譬如我今亦死。汝亦無奈。從今以後。我持齋念佛。不管閒事矣。子順母命。宅旁葢一茅舍。禁足念佛。經歷五載。至順治十七年。五月二十日。忽向子言。可買木作龕。吾於二十三日午時。西方去矣。遂往鄰家辭別。屆期。念佛而逝。頃之。出火自焚(蓮藏)西史氏曰。夫亡而修成淨業。則夫必藉以超生。理實可推。近世有青年喪偶。而自盡其驅者。縱節烈可風。失利益矣。孰若蔣氏之為得計耶。

賀氏

賀氏。常州魏村人。與夫潘尚高。同修淨業。日誦金剛經。晨夕禮 拜念佛。回向西方。康熙十九年七月。有疾。預期二十九日午刻。 辭世。屆期。子女畢集。又延諸善友至。齊聲念佛而終(蓮藏)。

黄氏女

黃氏女。名峻。不詳其里居。自幼失怙。隨其祖母顧。禮佛誦經。 年十四受陵某聘。甫五日而病。且劇。乃決意出家。命扶掖起向佛 膜拜。懺悔宿業。壻聞來候。家人欲引至榻前。峻搖手止之。日暮 延僧受戒訖。朗呼陸某曰。自今姻緣斷絕。勿復為念。爾亦及早回 頭。毋久迷也。遂令僧祝髮。從之合掌三謝。翛然坐脫。逾時不 傾。次日家人為更衣。體發異香。眉頰間。紅光赫然(何士瑗陰隲文註 釋)。

王荊石女

王荊石女。江蘇太倉人。許字徐景韶。年十七。忽長齋受戒。朝夕禮大士像。後景韶病死。聞訃日。即布衣草履。別築一室。焚修五年。一日與家人別。期重九日當行。屆期。左手結印卓立而逝(何士 暖陰騰文註釋)。

陸氏

陸氏太倉人。大西關外。張季思妻也。年十七。即長齋念佛。且誦金剛經。大悲呪。回向西方。見殺物命者。即發願救度。康熙四十二年九月。空中見輿舟西往。其肩輿運舟者皆僧。不三日安然念佛而脫。時為九月二十六(西歸直指)。

徐氏

徐氏。松江人。歸本郡楊拂齋。年三十二。茹素念佛。并虔持大悲神呪。期生安養。每晨興。必盥洗焚香。念佛千聲。持呪二十一遍。然後理家事。如是數十年。乾隆三十五年。夏微疾。至六月八日。課誦如常。持呪刻許。漸覺聲出戶外。視之已含笑坐逝矣。時值酷暑。三日後。顏色如生。焚化衣衫。火燄皆成五色蓮華。見者歎異(染香集)。

兵家婦

松江一兵家婦。失其姓氏。寡居無子女。住普照寺南。性質直。見婦女有過。必面斥其非。以故婦女輩。多敬憚之。婦日有常課。曉起誦金剛經數卷畢。始經理紡績。資生等事。夜則闔扉念佛。至老不倦。一日有高行老僧。過其門。婦合掌問曰。我聞金剛不壞身。誦此經者。肉身亦可不壞。信乎。僧曰。然。婦隨坐脫。時當盛暑。貧無以斂。三日尸不腐。異香滿室中。提督楊公捷夫人親臨其喪。即其地建坐化庵。漆其身。至今尚存。後有鎮江某氏婦。隨宦松城。青年夫死。自誓守貞。焚修此庵。以念佛為日課。五十年。足不踰閩。年荒煑草為食。婦女輩或問之。非其人一毫不受。先後致徒數人。不堪其苦。輒散去。年五十。語其所契某齋婆曰。我既歸向佛門。不可不聞戒律。遂偕往大雄山。禮谿谷和尚稟受戒法。既歸行持益勵。年近九旬。念佛吉祥而逝。事在乾隆中(染香集)西史

氏曰。盛暑不腐。必其淨業<mark>已</mark>久。色身堅固者能然。而往生淨土之人。或不盡是。勿取相以求可也。

曹媼

曹媼常州柏天佑母也。天佑平牛樂善。事呂直人謹。嘗設鸞問仙 術。退輒冥心端坐。己而至蘇。或詒以西方確指一書。闢仙術。指 歸淨土。始回向佛乘。然頗疑與仙術異。以問真人。真人曰。爾何 疑哉。三災到時。我輩亦無別路可走。樂邦安隱。爾其勉之。因令 兼誦金剛般若經。天佑意遂釋然。先是媼年六十四。病熱。天佑自 蘇馳歸。視母氣已絕。唯胸前微溫。家人為治棺衾。天佑悲慟。禱 於白衣大士。誦白衣呪一萬二千。願減己壽一紀以益母。涕淚并 下。其明日索飲。閱數日。病起。言始死時。為兩吏所引。歷土地 城隍諸司。尋詣東嶽府。府君言汝有子。為汝誠禱。仗大士力。貸 汝死。命吏引出放還。天佑由是勸母修淨業。媼遂長齋。日以初中 後分。掐數珠。課西方佛名。回向淨土。居十二年。年七十六。九 月既望。晨興。謂天佑曰。吾將去矣。可召諸親屬為別。越三日。 起坐。洗沐易衣。就枕而逝。又天佑有外姑許氏母。家居。亦長齋 念佛。而未能專一。天佑迎之至家。教以放下萬緣。一心念佛。母 如其言。時年六十五矣。自三月至六月。未嘗有間。一日。向天佑 拜。驚問其由。曰。吾牛六十餘年。顛倒夢想中。未嘗獲一日安 樂。自子導我以念佛。吾旦而念焉。俄然而夜矣。夕而念焉。俄然 而旦矣。世間安樂。何以過之。微子則不及此。是以拜。天佑因為 稱說極樂莊嚴。且曰。但得一心。聖境自現。聖境現時。亦勿生 著。又三月。方夜坐。忽見金蓮華現前。己而化作百千萬億。鄂不 層出。上升虐空。光耀無極。向晨。復拜天佑。言其事。 母自是容色腴潤。如三十許人。終日無他言。夜臥更許。即起坐念 佛。時乾隆四十二年。後不詳其所終(西方公據。集驗)西史氏曰。觀 真人此語。則修淨土其急務矣。世有崇仙術而譏佛理者。將誰欺 平。

陶氏

陶氏。名善。字慶餘。一字瓊樓。蘇州長洲人。彭二林居士。從子 希洛之妻也幼頴敏。通等韻之學。與妹仁。晨夕酬倡。性愛蕭寂。 遇佳山水。一往有遺世志。時見於詩。亡何。妹得羸疾以歿。遂輟 詩。不復為。讀大報恩經。感如來往昔苦行因緣。遂發大願。願證 無生法忍。手書是經。及金剛彌陀諸經楷法端整。日誦西方佛名不

輟。著慚愧吟數十首。多近裏。之言。既嫁日與家人。說苦空無常 之法。晨興。仍課淨業。以次閱法華楞嚴華嚴諸大乘經。信解益 利。其年秋。和二林居十閉關詩十首。一云。無相光中自有真。慈 風披拂四時春。而今一著通消息。回向蓮邦稽首頻。二云。原來無 實亦無虐。論道談禪事也餘。一句彌陀空自性。孰為是我孰為渠。 三云。[潜-日]泮波塘水影定。照空萬象慧光圓。須知行滿功成 後。鳥語花香也自然。四云。亭俯清流屋倚山。綠蘿影裏掩松關。 閒來好認歸家路。免得臨時無處攀。五云。淨域神遊明似日。杖頭 何用夜然藜漫論十萬八千路。樓閣虐空更在西。六云。行樹何殊七 寶林。枝頭也得聽靈禽。自然說法東風裏。演出百千微妙音。七 云。夙夜惺惺徹底看。幾番生滅總無端。前村雪後梅花放。露出春 光不可瞒。八云。九十風光易寂寥。然燈朗照度春宵。烹茶非為清 香味。適興何妨一飲瓢。九云。此土結得蓮華盟。八功德水蓮華 牛。一心不亂超凡品。定向樂邦淨處行。十云。勘破重關觸處真。 從今不入舊迷津。輪回六字無終始。流水行雲總是春。入冬咸疾。 自知不起。時誦西方佛名。歿之前。請母為別。己而曰。大和尚 來。吾去矣。侍者曰。如老人何。曰西方好。吾他日。當迓老人去 也。遂瞑。時為乾隆四十五年。正月二十三日。年二十五。四十九 年春。有西方大士降於玉壇。為諸弟子宣揚淨土法門一日。二林居 士往造焉。問異時師友所生諸處。大士一一答之。某生兜率。某歸 福報。其生淨土者四人。香山老人(名實定)。旅亭(名際會)誓願(名佛 安)二師。沈居士敬孚(名炳)也。(以上四人詳聖賢錄初編)最後問及陶 氏。大士曰。陶氏己生西方邊地矣。未幾陶氏至。題詩曰。雨歇閒 階芳草多。五年消息等流梭。洞中深閉煙霞迹。一任薰風送客過。 因語眾曰。子等歸向極樂。全要打得一副金鐵心腸。外不為六塵所 染。內不為七情所錮。汗泥中便有蓮華出現也。一句佛號。便有一 光。千句佛號。便有千光。光自內生。非從外得。以無相故。阿彌 陀佛。在爾諸人面門。隨處出現才有絲毫隔礙。此光便不能發現 矣。念佛心要時時覺照。方發得不退念頭。念佛聲要心心悲切。方 發得無上願力。心聲互融。光明四徹。無處不是佛。無時不念佛。 方為得手。佛號無量。要知智慧無量神通無量慈悲無量。攝受無 量。苟不發無量心。安能親見本師頂相。悲哉眾生。欲念未除。道 根日壞。佛之視爾。將何以堪。快快念佛去也。踰月。二林居士復 往。致札陶氏曰。聞卿得生淨土。不負生平志願。大善但羅臺山。 朱仲君。清齋宏誓。甚為希有。尚羈福報。而卿戒品未全。功夫未 熟。乃能直往無礙。此何故也。其往生時光景。既生後如何享用。 如何進修。亦已見佛否。已登不退地否。試一一言之。俾聞者起欣 慕心。起精進心。斯亦度人之本願也。其曰大士降。報云前月予適 從西方邊地行化而來。故陶氏亦得隨到。今日彼不能至矣。彼平日功夫戒力。雖不及臺山輩。然臨終正念。遠勝臺山。故感觀音接引終時。見金蓮華現前。即覺身變男子。已到西方七寶世界。衣食自然。雖不能見佛。每日諸大菩薩說法二會。精進者漸登九品。懈怠者壽五百歲。娑婆百年。邊地一日。陶氏自往生以來。頗精進將來。可得上品下生。其時尚須娑婆二千年耳。大士者。號寂根。無量壽維摩詰諸經。皆嘗與法會。其證果久如。未能詳也(善女人傳。瓊樓吟稟。西方公據。書證)。

汪氏

汪氏。自號鏡智道人。吳縣人。歸李景喜為繼室。年二十六而寡。 子甫七月。汪氏既痛其夫。適有以枯髏圖相示者。瞿然發出世心。 既復從有些和尚受念佛法門。遂長齋。晨夕向西。懺悔發願。誓畢 此生。決生安養。導諸族姻里黨。下及園丁竈婢。同歸佛法。從而 起信者。百餘人。其長齋修淨業者。十餘人。已而參聞學定公。聞 是心是佛之旨。有省。年三十四。從旅亭會公受菩薩戒。誦梵網 經。發心刺血。書法華彌陀二經。苦舌血不繼。有僧教以子午二 時。應候取之。始克終事焉。故有肝疾。歲秋輒發。至是血既枯。 疾發益劇。或勸以補養。曰。此間學道。多致退緣。得速捨報身。 見佛聞法。吾之願也。復何求哉。乾隆四十九年十一月。下痢。臥 牀數日。默觀不輟。至初十日。語侍者云。明日吾當西方去矣。問 牛何品。曰。中品上生。明日。有方氏婦省之。汪氏曰。子來大 好。可為我洗沐。洗沐畢。趺坐頃之。命同舉佛名。方午。合掌而 逝。旃檀香滿室中。年三十八。其後三年。有同里何氏。女病死。 至三更而蘇。自言到冥王殿中。王令鬼卒。取鎚欲打。忽見旛幢。 擁護一道人。自西方來。在冥教化。端正嚴潔。世無與比。審視 之。即萬年橋李家姆也。冥王跪迎。稱菩薩。姆令釋我。引我歷觀 諸地獄苦。且謂持齋念佛。一意西方。時至迎汝。遂命輿送歸。以 是得醒。翌日病間。其兄子性三。書其事而傳之(一行居集。西方公 據。書證)。

費孺人

費孺人。名蘭襄。世居吳江縣。即彭二林居士妻也。居常未嘗置人。有不如意事。默默而已。先是在家時。庶祖母王氏。好作佛事。孺人輒心慕。奉持齋禁。既嫁不輟。自歸居士五六年。連舉二女。已而居士修西方之業。每道出苦之要。孺人遂屛葷血。獨宿小

園。日與二女。講讀大乘經。回向淨土。乾隆五十五年秋。病肺嘔血。消損異常時。遂詣文星閣。請祥峰和尚。受優婆夷戒禮。誦益度。平生偶有私蓄。輒作佛事。至是罄所藏。屬居士詣雲棲建水陸大齋。願與一切有情。同生淨土。啟經之日。家中人皆聞異香。已而疾亟。臥牀五日。日向西。祝云。阿彌陀佛。當來迎我。居士自杭歸。策之曰。資糧已具。撒手便行。勿戀此殘生也。孺人曰。吾何戀哉。但患不能速去耳。其夜過半。忽朗唱佛名。可十聲。頃之遂逝。時九月八日也。後數年。普門大士降乩。司乩者黃敬敷。叩孺人生處。大士示云。一念能回向。送心先到西。功修久已積。終不退菩提。現生懈慢國。(西方邊地)將來可登九品(一行居集。西方公據。書證)西史氏曰。自二林居士宣揚淨土法門。眷屬中。隨順修持。先後往生。錄至此。葢五人焉。善人並萃一門。良非偶然矣。

許節婦

許節婦。太倉錢氏女也。年二十歸太學生許照。六載而寡。乾隆三十七年。有司上聞。以節婦 旌。節婦自幼信西方之教。母遘危疾。節婦禱於佛。日誦佛名千聲。病尋愈既寡。事佛益虔。時出所藏。濟貧拯厄。惠及禽畜。日誦金剛經。回向生西。晚而斷葷血者六年。先歿前半月。夢觀世音現身接引。及期。命侍者焚香。合掌誦西方佛名。趺坐而逝。時乾隆五十七年。二月四日也。年七十二(一行居集)。

宋孺人

宋孺人。長洲人。歸太學生。顧文耀。事姑謹。姑故奉觀音大士。 既即世。遺宋甆大士像。孺人供奉日虔。垂十餘年。已而其子晉 芳。夢兩大士。身衣破衲。如有所乞。旦遇一舟子。攜兩軸來售。 一舊刻吳道子。畫僧相觀音。一繡像送子觀音也。急償以直。屬工 莊新。送貯里中月聲庵。逾年。晉芳復夢兩大士。云將有行。急往 視之。則庋置之。壁間久矣。遂齎還家。張挂淨室。孺人日侍像 旁。誦西方佛名。及諸經呪。瞻拜無虗日。一日室中甎面。忽現僧 相大士。如道子畫。其後八日。又現一尊作送子像。善財龍女。 後迸出。遂發甎刻像。金容爛然。自此迸除葷血。一心淨業。晚得 痺疾。日扶掖下牀。課誦不輟。已而感熱增劇。臥病半月。臨終。 訓勉諸子。各敦本行。命同稱佛名。勿哭。遂合掌至頂誦所習呪。 忽聞異香滿室中。泊然而逝時在乾隆五十七年五月。年五十四(一行 居集)西史氏曰。潘萬宗居士。衣灰現三聖。今孺人甎面現大士。皆 精誠之凝結也。而或疑其荒誕。試問蛤蜊壳中。豬牙齒[臼-(一*一)+?]等之變現。獨何與。

鄭氏

鄭氏。松江人。適吳姓。少寡。矢志柏舟。別搆淨室。閉戶誦經 念。佛者數十年。至嘉慶初。年七十九。庭前石上。忽生大蓮華一 莖。適其母舅蔡鴻業司<mark>寇</mark>。致仕歸。見而奇之。為文勒石。記其 事。是年。臘月。謂家人曰。我將西歸踰旬無疾而逝(染香集)。

百不管老媼

百不管老媼。失其姓。杭州人。嘗問於孝慈庵。道源和尚曰。修何 法門。一生決離苦海。和尚曰。無過念佛。然念佛不難。而難於持 久。持久不難。而難於一心。汝若能一切不管。專心持名至誠發願 往生。臨終佛來接引。即得離苦海矣。媼歡然拜謝。歸即將家事。 委子婦等。闢淨室供佛。修持其中。年餘。復問和尚曰自蒙開示弟 子。棄捨家務。專事念佛。自問亦可謂久而不懈。但苦一心之難。 師當復有以教我。和尚曰。汝雖拋却家務。而兒孫眷屬不無厪念。 此則愛根未拔。如何一心。汝今加功。先抜去愛根。將一切放下。 然後能得一心也。媼歎曰。師言是也我雖不管於身。不能不管於 心。從此真當百不管矣。遂愈加精進。愛心偶動。即默持此百不管 三字。以自驅除。或咨以家事。亦依此三字拒之於是百不管之名。 播傳親黨間。如是者又年餘。一日詣庵謝曰。師不我欺也。弟子西 行有日矣。數日後。無疾而逝。嘉慶初年事(染香集)西史氏曰。百不 管。渾名也。推言之。則百至千。千至萬。皆所不管矣。約言之。 即一日不管。何有於百。能如是而後塵緣可斷。能如是。而後淨業 可成。嗚呼。安得世間人士。咸如此百不管耶。

陸氏

陸氏。婁縣人。適周姓。中年茹素受五戒。遇西禪寺僧邁春。示念佛法門。即依教行持。三十年不倦。夫死。依壻袁退葊家棲止。嘉慶十一年。感微疾。一心念佛。期生淨土。臨終。右脅而臥。如入禪定。室中異香。直诱中堂。及殮。猶有餘香(染香集)。

吳氏

吳氏。蘇州元和人。適張姓。中年奉佛。歸依畫禪寺。道林和尚。 茹素戒殺。專心淨業。後因夢中。見觀音大士。教以跪念。於是每 念必跪。香燼始起。未嘗稍懈晚年有微疾。命子眉山。延僧數人。 念佛至三日。乃曰。我見空中有兩和尚招手。僧曰。此二大士也。 正宜一心向往。言未竟。已吉祥逝矣。眉山亦因母教。遂長齋。奉 佛云(染香集)。

沈媼

沈媼。法名善月。吳江黎里人。歸陳士坊為室。生子二。年二十五。修念佛三昧。四十斷葷血。屏家務。勤行放生諸功德。既喪少子。旋孀居。功益進。日誦華嚴行願品一卷。大悲呪五十徧。佛號三萬聲為正課。暮年。從子遷居城中。闢一靜室。不越戶限。寢食於斯。棲心淨土。數十年如一日。年七十五。染恙縣延。佛名不輟。臨終。呼眷屬扶起。索湯盥身。易衣趺坐。面西合掌而逝。俄而几現蓮華影像不滅。時嘉慶二十一年。十月二十八日(染香集)。

姚氏

姚氏。松江人。平日從夫張某。奉斗甚虔。已而姚氏患病。其姊省之。教以專心念佛。從之。甫半日。忽笑曰。我見蓮華無數。大如斗。語竟即逝(染香集)西史氏曰。見蓮華。不見化佛。持誦之功未深耳。而一生安養。終當見佛矣。

汪氏

汪氏。華亭人。年十六。歸周文榮。家赤貧。文榮遊幕遠方。汪氏女紅自活。長齋奉佛。後文榮客死湖北。久無耗。汪氏撫子方容成立。乃命尋父。方容徒步數千里。卒負父骨歸。學使採風。以母節子孝表其閭。方容故善書畫。人重其孝行。爭搆之。以是甘旨無缺。汪氏晚年。念佛益虔。願父母翁姑及夫。齊生蓮界。嘉慶某年。得疾。曰閉戶念佛。不問家事。臨終。謂方容曰。我昨夢汝祖父母。外祖父母。及汝父。俱住蓮華世界。現前五色雲。擁一瓣蓮。大如舟。我殆乘此往生乎。言訖。怡然長逝。室中香氣如蘭。險時未散(為香集)西史氏曰。前發是願。卒符其夢。然則夫歿而修淨業。夫必藉以超生。顧不足徵歟。願法界眾生。同歸安養。回入娑婆。必能度脫。又不足徵歟。乃今之節婦。不明乎是。小則哀傷得疾。大則隨夫長往。不知一盡今形。各隨其白業黑業而報之。縱能

相見黃泉。亦祇同於陌路。唯西方淨土。諸上善人。俱會一處。其間利害。實霄壤焉。唯智者思之。

王氏

王氏。金山縣人。適張姓。善事父母舅姑。嘗兩次刲股。夫歿。柏 舟節橾。家法肅然。每見喪家接眚甚怖。因問人曰。何能免此。或 告以念佛法門。遂發心茹素。禮誦不輟。教諸子婦。闔門信奉。力 行放生掩骼諸善事。後患脾疾。求參一和尚。受優婆夷戒。經年病 革。行願益誠。臨終。誦彌陀經。以次稱佛號。移時而逝。遺命不 迎眚神。不以葷酒設祭。子婦皆從之(染香集)西史氏曰。用葷酒而設 祭享賓。於亡者失大利益。智者弗為也。至於迎眚之舉。尤屬不 經。而積習成風。深堪痛恨。修行人。力挽穨靡。此其可法矣。

吳媼

吳媼。江甯人。夫早喪。遺一子。撫之成立。婚娶數年。子又亡。乃與寡媳。共撫弱孫。孤苦度日。後篤信淨土法門。長齋奉佛。受優婆夷戒。潔小樓供佛像。每晨起盥漱後。即炷香禮拜。持佛名三千。定為日課。課畢。始理家事。如是數十年。同里有朱本願者。素與其子善。故常往還。嘉慶二十二年春。媼忽謂之曰。却後某日。子幸過我。有一緊要事。須託辦也。本願諾之。至期往。媼已搭縵衣。趺坐牀上逝矣。問其媳云。近日課誦如常。精神亦佳。昨夜索浴畢。即安臥。不知何時坐化也。本願因為料理喪葬事焉(染香集)。

倪嫗

倪嫗。法名顯真。嘉善人。住北港村。歸依佛門。茹素念佛。村中舊有觀音像。嫗早晚禮拜必誠。每供佛飯僧俱親自任勞。嘉慶二十二年九月。數覩菩薩現相。隨示疾。謂其子曰。我數見菩薩喚我去。殆將去矣。子云。既菩薩降臨。應備齋供。兒親往城中。買蔬供奉。如何。曰。亦好。但恐不及耳。子遂往。及歸。嫗已趺逝。念珠猶在手也(染香集)。

潘氏

潘氏。婁縣人。適孫某生四女。智求。智禪。福庵。德庵。俱奉佛受優婆夷戒。勸母發心。嘉慶二十三年。潘氏年七十九矣。會西林寺傳戒。四女復勸受戒。臥病。未能往。因代求之。錫法名曰印蓮。潘氏知之。即斷肉食。一意西歸。是冬。南禪寺起念佛七期。四女同往念佛。至第六日。潘氏命促之歸。曰。速焚香。佛來矣。遂吉祥而脫(染香集)。

汝氏

汝氏。名季婉。吳江黎里人。適王枚為繼室。夫婦相敬如賓。五十餘載。未有所出。為人靜厚。居常一以念佛為事。嘉慶二十四年。二月三日。病篤。語家人曰。大士來臨。吾其逝矣。即合掌垂目。誦大悲呪。旋聞旃檀香滿室中。歿後。慈容含笑。顏色轉少。年八十二(染香集)。

祁氏

祁氏。法名德濟。江南興化人。歸同里王生。年未四旬。慨然以濁世為厭。誓願求生安養。日誦佛名三萬聲。歸依溪谷和尚。旋受優婆夷戒。年八十九。染微疾。其年三月八日。告所親曰。我十六日當西去。或謂之曰。十六乃紅沙日。不吉。祁氏曰。我修行人。不依俗忌。有何不吉耶。雖然。勿令俗人議我。致退善心。即以十四日去何如。至十四日。晨起。披縵衣。持佛名而逝。時在嘉慶中(染香續集)。

王氏

王氏。鄞縣東鄉樹橋人。生不茹葷。自幼歸依三寶。法名淨隆。既嫁。信向念佛法門。其夫性暴。時加詈辱。王氏唯忍受而已。年六十餘。益精進。一夕其舍被鄰隙放火。旋經撲滅。後赴寶林佛會。僧問倘爾時被焚。將若之何。曰此身可厭。被焚。即乘之而去矣。越歲。其鄰復放火。舍遂被燎。王氏竟不走避。唯緩聲持佛名。魚聲朗朗。火光中。隔河人家。初見煙燄幕其居。忽有金光一道。直沖霄漢。彷彿見王氏現身。火滅。家人尋視。見其遺骨。若趺坐地上者然。

又鄞邑下殷有張氏者。與王氏同師。法名淨音。其信向念佛。而不得於夫。亦與王氏略似。雖百般磨折。道心不退。後患癱症。臥牀數年。念佛無間。臨終合掌而逝。異香滿室。經數刻乃已。

又鄞邑定橋有陳氏者。亦與王氏同師。法名淨瑞。為人撲實。念佛求生。無少疑貳。常自言。我決定能生淨土。臨終。熙怡端坐。念佛而逝(染香續集)西史氏曰。王張二氏。宿業甚重。故自生至死。備嘗諸苦。卒以淨願堅牢。咸感瑞應。乃知前世之餘殃。不能累今生之勝果也。至若陳氏。雖宿業輕微。易成道業。不及二氏之忍力堅定。然其一往之意氣。絕不跂路亡羊。令人覧而神壯。可謂一門三傑矣。

潘氏

潘氏。蘇州吳縣人。松江諸生。劉熙妻也。性仁慈。見人急難。恒周之。雖家貧不顧也。晚年戒殺放生。日課西方佛名數千聲。兼誦心經大悲呪。如是數載。道光四年閏七月。有疾。謂家人曰。我死切勿哭泣。當念佛助送。絕不及家事。日唯合掌誦經念佛。臨終。目將瞑。忽厲聲曰。阿彌陀佛來矣。遂逝。時為二十二日。年五十九。逝後閱半月。忽附家人身言。我今依舊修行。作出家人矣。問曾往西方否。答尚未。問曾至陰司否。答不往西方。不能不至陰司。但與常人不同耳。我今特來相報。此後不復來矣。言訖而寂(染香集)西史氏曰。臨終見佛。而不即往生者。何也。良由修行時。於是心作佛之理。未及透明深切。故陰境得而乘之。然以女人五障之體。遂能轉作出家人身。即此一轉。力重萬鈞。來生由出家修行上。徑登極樂。理可必矣。是錄專載往生。因此傳足為修行者勵。故登之。

朱氏

朱氏。法名妙德。嘉興人。素患血疾。適許姓。年二十八。夫故。一子復夭。以鍼黹自活。家雖貧。見人飢寒。輒罄囊與之。道光六年春。同姑母妙圓。表妹立修。於精嚴寺。受五戒。長齋念佛。求生淨土。一夕在妙圓佛堂內添燈油。見燈華結成荷葉一片。葉上立佛一尊。即邀妙圓立修至。皆見之。九年正月。因母歾過哀。血疾復發。不能營作。常至乏食。性介。不輕干求。同里人知之。請誦大悲呪。與度日之貲。至七月十八日。病劇。立修來視之曰。他人皆言。姊念佛精進。吾謂汝心尚未切。所以病不能愈。佛不來迎耳。朱氏涕泣懺悔。益自努力。自後他人問言。皆不答。手唯合掌。眼唯流淚。夜將半。忽笑曰。西方三聖至矣。焚香洗沐。念佛數十聲而終。年四十四(染香續集)。

朱氏

朱氏。法名妙圓。即節婦妙德之姑母也。歸許蔗如。道光元年。夫故諸子已成立。即將家產分析。其第三女法名立修。幼字徐姓。未婚而夫亡。後歸徐門守貞。而常居母宅。設立佛堂。母女同修。早晚課佛外。日禮大悲淨土懺各一時。誦金剛經三卷。餘時念佛。不談雜事。遇放生濟貧等事。竭力皆為之。九年七月。妙德先逝。現往生瑞相。朱氏曰。吾壽不永。亦欲去矣。至八月二十九夜。呼女曰。頃聞鐘鳴。已交寅時。今日吾神氣稍疲。不能進佛堂禮誦。报可朗誦佛號。吾聞爾聲。運想可也。立修早課畢。進藥糜。曰。沒可問誦佛號。吾聞爾聲。運想可也。立修早課畢。進藥糜。曰。兒等罔極未報。全賴吾母教訓。今何遽忍舍去耶。笑曰。吾兒女雖多。吾修淨業。塵事毫不繫心久矣。命延僧數人。輪流念佛。僧集淨水盥沐。自未至亥。隨眾默念。忽張目曰。接引佛來矣。爾等速焚香頂禮。即含笑垂目而逝。時窗外忽有白光一道。徐徐向西去。人皆異之。年五十九(染香續集)。

羅氏

羅氏。甯波慈谿人。長齋數十年。禮拜持名無一日間。嘉慶初。隨夫姚惠成。徙居杭州北新關。貨煙筒為業。貿易之暇。勉夫念佛。惠成由是亦持長齋。道光九年。三月四日黎明。謂夫曰。可入城招女壻來。為我念佛。其壻張懷靜。向師吳允升。奉佛維謹。惠成往招。適因事稽阻。至日午。曰。吾不能待壻矣。具湯洗沐。趺坐念佛。日將昃。安然化去。面有笑容。年七十八(染香續集)。

王氏女

王氏女。常熟人。素持白衣呪。及觀音名號。年二十餘。得瘵疾。 一日告其母曰。兒命本於八月中謝世。因疾苦纏身。不能待。禱於 菩薩。已許先一月迎我矣。母弗信。及期。晨起。而有喜色。曰。 菩薩來矣。母疑其見崇以刀揮之。女奪刀告曰。嘻。菩薩也。速 拜。尚不爾罪。母從之。拜起視女。已合掌逝矣(往生近驗錄)。

邵媼

邵媼。不詳其人。貧而寄食於姻戚家。念佛精進。曾於道光十七年。秋夕。暗室面西。忽心開。見西方勝境。明年秋。復覩菩薩金

像。晃耀心目。又明年五月十四日。以微疾逝。逝時。人不及見。 唯醫生范姓。入為診衇。見其目光如生。面容猶笑。而鼻已無息。 范出而歎曰。此善逝也。吾見亦罕矣(往生近驗錄)。

張家婦

張家婦。常熟人。素念佛。一日。示微疾。晨課已畢。仍誦佛名不 輟。異於他日。謂家人曰。吾今日逝矣。家人不信。頃之。珠落而 逝。異香郁然。達於鄰里。咸集其門。驚歎希有。時道光十九年。 正月七日也(往生近驗錄)。

俞媼

俞媼。常熟王效曾之母也。性和淑。效曾素奉三寶。勸母斷葷血。從之。長齋三年。道光二十年春。得疾。臥牀不起。入夏病劇。效曾勸以默觀西方。媼由是發心念佛。然不能無雜念。因循數月。屢入冥界。初則有兩童子喚之回。繼則菩薩命回。末後則夢中聞佛語。若其前世固僧。因昧本而墮女身者。自是漸却飯食。已奄然垂絕矣。忽於夜半。朗唱佛名三四聲。合掌西顧曰。佛來矣。右脅而逝。時五月二十五日也。後其所愛長孫。夢至一境。行樹樓觀。不同人間。但有闌楯限之。曲折繚繞。而不得踰入其限。忽見嫗方遊行來。問從何入。媼曰。汝欲入。非念佛不可。其孫聞言。遂寤。述其夢如此(往生近驗錄)。

吳婆

吳婆。蘇州人。自幼篤信佛法。夫家姓郟。壽七十餘。持齋誦佛。 歷有年所。道光二十一年。正月十二夜。忽通宿命。知其長子前世 為僧。次子則已三世為母子。所言皆絕異。既而曰。吾今歸西方。 永絕塵世矣。遂西向合掌而化(往生近驗錄)西史氏曰。業緣盡而智慧 開。其理至常。無足異者。

錢孺人

錢孺人。名瑞雲。常熟人。夫謝鳳梧。患病。孺人禱於佛。願持長齋而痊。自歸鳳梧數載。舉一子一女。未嘗噉以葷血。已而知淨土淨門。遂偕鳳梧受淨戒。斷情愛。道光二十二年。其兄萬鎰往生。孺人目擊其瑞。信向益篤。其年冬。子殤。哭之慟。既而曰。天其

欲斷愛緣乎。漸不介意。閨中相對。唯策勵而已。母吳氏。有疾誤於醫。至不起。孺人念佛送其終。至二十五年。六月。自患咯血疾。漸劇。其女亦病。鳳梧恐其復萌愛念。策之曰。未有心戀娑婆。口稱淨土。而能往生者。子其勉之。孺人瞿然興。作禮曰。賴君開示。吾知警矣。遂向西懺悔。涕淚并下。意極懇切。病中時聞異香。至七月二十日。後其女歿。孺人曰。今愛障絕矣。我歷盡諸苦。轉得自在。從此往生。不大快哉。遂屏穀食。渴唯噉瓜。延至八月九日。僅存一息。其夜過半。忽厲聲呼鳳梧曰。障重。速為我然臂香。鳳梧從之。初若昏倦。繼則目光炯炯。正念分明。人問一心不亂否。孺人點首者再。忽命扶掖起坐。兩目上視而逝。年三十一。越日就殮。頂門猶煖。貌如生(錢孺人事略)。

沈婆

沈婆。法名悟通。吳江黎里人。年三十九。長齋念佛。矢願生西。受菩薩戒。六時皆有定課。六旬餘。一夕忽夢空中現五色雲。湧舟西來。觀音大士坐於舟中。活動如生。莊嚴奇妙。世無與比。醒而念佛益銳。雖老病。不減程課。後以念佛七期。用力過猛。病遂劇。居邑之地藏菴。至四月八日。謂侍者曰。今日為佛誕。扶我起坐。吾行矣。侍者勸曰。婆病甚。宜善養息。厲聲曰。佛來接引我。遂聳身欲起。侍者力助之。更衣而逝。遺命以龕斂。用闍維法。從之。時在道光二十七年。壽六十八(呂默庵述)。

陸安人

陸安人。名岫梅。蘇州元和人。歸理問君吳昌濂。舉一子。殤。年二十而寡。悲痛不已。得咯血疾。有以龍舒淨土文攜示者。遂回向佛乘。晨夕有定課。家中戒殺。食三淨肉。蟲蟻木草。咸所愛護。道光十四年。鐵君定公。校大乘經數十種。設局刊印。五年。始畢延其事。既從定公。受三歸五戒。定公名之曰師壽。已而詣鄮山。禮阿育王塔。見塔中舍利現光。自是行善舉益力。嘗出貲三萬兩。造像修寺。作諸功德。而尤勤於放生。歲出千金。不吝也。或有譏之者。曰。財產匪堅。勝緣難值。仗此功德。與四恩三有。早證無上菩提。吾願足矣。復奚戀哉。年三十四。疾大作。醫藥罔效。乃誓放生命一千萬。於師林寺建水陸大齋。以作往生資糧。病半載自愈。越五年。煉臂發願。斷葷血。祭先祀神悉用蔬果。四旬生日。又於師林寺供飯僧。親友祝嘏者。以所刊法華。華嚴等經施贈。其年秋。夢至一處。水流華放。逈非塵境。身立一橋。異香撲鼻。竊

自念言。此其為七寶池乎。何不見我佛也。俄而金容寶相。徧滿遙 空。心大喜。方頂禮間蘧然而覺。晨起以告家人。未幾疾作。醫者 勸食肉。弗從。沈吟數月。疾垂革。謂所親曰。吾之始願。志在出 家。今不果矣。我死。汝等勿哭。殮必披僧伽黎。喪中設祭享賓。 勿用葷酒。吾姑年逾八旬。牛死亦日暮事耳。異日壽終。亦如吾 法。為我延比丘尼。六人。念佛助往生。從之。臨逝前二日。令家 人代受菩薩戒。已而神識瞀亂。不克自主。大懼。乃迎佛像一尊。 供牀畔几上。注目默觀者。一書夜。至五月四日清晨。念命掖起 日。大和尚己行。吾西方去矣。今同稱佛號。手自拈香敬佛。人問 大和尚何在。曰。坐几上者。遂面西趺坐結印而逝。年四十一。時 在道光二十八年(朱兆杓撰陸安人傳胡珽目擊)西史氏曰。余之歸心佛乘 也。自安人之刊經始。而安人之聞淨十法門。則自先君子勸誘始。 善哉。因緣之迭相化導也。迨先君子既歿。而安人行善益勤。立誓 益切。雖須眉丈夫。猶愧之。其直往西方。固官矣。 總論曰。阿彌陀佛。於十方女人。有大誓願。其詞曰。若有女人。 聞名信樂。厭惡女身。壽終之後。復為女相者。不取正覺。則閨閣 賢豪。乘此方便門開。亟須爭先捷足。橫截牛死之流。直取菩薩之 岸。否則輪回六道。安能保其不墮。余次諸賢之傳。深幸韋提希之 遺風。今猶未泯也。安得起而徧示閨閣哉。

往生物類第七

雞

明崇禎間。有吳雪崖者。為福州司理。生平虔奉佛法。其地開元寺。僧多食肉。不守戒行。雪崖請示立石。以禁之。一日坐禪堂。有雞作唱佛聲。索得之。謂僧曰。若輩謂寺中。久不養生物。如何有雞。今觀畜生。尚有佛性。汝薙染破戒。不及此君多矣。寺僧始立誓齋戒。遂攜養署中。恒念佛不輟。後遷官過丹陽。送至海會庵中。以其為接眾所。使遠近生信也。雞至庵。即念佛立化。為建塔供焉。

又中州僧覺圓。發願廬山東林寺齋僧。立關募緣。時護關僧至華氏托鉢回。有雄雞隨至中塗。僧送還華氏。因閉其門。雞從屋上飛出。追赴關所。旋繞不去。同立關三年。後攜往東林。為之受戒。大眾上堂念佛。雞忽隨之。踰年齋僧緣畢。雞即坐化。瘞於寺傍。又傳載江西有聽法蛇。廬州坐化貓。峽中有有坐化猴。巢縣柘臯鎮。有立化雀。黃大參庭翠。有放生坐化豬。種種靈異。不可殫述(唐宜之中馭乘。淨土晨鐘)總論曰。五濁惡世。染心易熾。淨德難成。

故經言娑婆勇猛一日。勝於淨土百年。今以物類而較人類。抑又其 難焉者矣。而一念投誠。三塗解脫。物類且然。況於人乎。 淨十聖腎錄續編卷四(終)

No. 1550-1 種蓮集

蓮歸居士輯淨土聖賢錄續編。採訪往生事實。共有百數十條。而續得於書成之後者。正復不少。余為另列一編。不分門類。不序先後。隨聞見而記之。名曰種蓮集。取思齊大師句。與君同作種蓮人之意。以俟後之輯三編者採取焉。

道光三十年秋九月。淨業學人陳本仁識。

善隆

善隆。台州臨海縣人。年十六。出家於蘇州白龍寺。參念佛是誰話。有省。夜坐不臥。過午不食。茹淡齋三年。<mark>刺</mark>舌血。書華嚴法華二經。日持佛名六萬。蓮華經一部。禮佛一千六百拜。準為定課。冬夏一衲。不妄談。力行致疾。益加精進。一夕於禪觀中。聞空中報曰。汝當得中品生。慎勿退息。遂屏諸藥石。一心西邁。至四月六日。端坐而逝。時在道光二年。年二十六。

達禪

達禪。姓狄。嘉善人。出家於本邑景德寺。嘗兩修般舟三昧。後住 北港荻秋庵。佛聲常徹戶外。見人即警策生死。一日謂其徒淨玉 曰。我明年定去矣。汝等勿忘淨土法門也。次年。詣清淨庵。主念 佛期。至第三日。示疾。仍入堂念佛。逾時。端坐化去。

王君榮

王君榮。太倉人。自幼持戒參學。見地超卓。後修淨土。日課佛號 萬聲。康熙五十六年。八月二日。預知時至。請淨名庵。乾行長老 至。令作證明。日方午。乾師曰。歸期盍於後日。答曰。吾決定今 日矣。遂索筆作偈。合掌而逝。遺命以龕斂。其女抱以入龕。力不 能勝。因默禱之。忽然輕舉。年八十一。

唐景垣

唐景垣。字筠谷。元和國學生。勤修淨業。每持名時。以指代珠。 年七十四。無疾而卒。氣絕逾時。猶指動作屈數狀。

沈載元

沈載元。字桂蕚。自號可僧。吳江人。中年業賈。六旬餘。輟業潛心淨土。長齋課佛。日滿萬餘。性慈恕。有所餘。輒濟貧放生。嘉慶十六年秋。有僧貿然而來。直趣臥所。略談數語。洞徹元微。并屬他日臨終。戒眷屬勿哭。言訖而去。載元感之。炷香門外。遙申敬禮。其年冬。示疾。佛聲不絕口。絕粒飲水者七日。至十二月六日清晨。令然燭四十八對。堂中設香案。洗體易衣。端坐合掌。朗誦佛名。呼眷屬同聲助之。頃之鼻氣如煙。聲漸微而絕。年七十二。及殮。貌如生。

王際良

王際良。金山縣人。年五旬。歸依三寶。念佛放生。篤志不倦。其年二月初。有疾。屛諸醫藥。日夜持名。絕口不言家事。唯曰。日望。我其行矣。至期果然。死二日。索取數珠。歿後。猶緊捻不脫。

夏耀文

夏耀文。華亭人。持齋念佛。一心淨土。四十餘年。舉家不茹葷酒。道光四年十月。微疾。至十四日。命掖起。合掌念佛而逝。遺命龕殮。入龕時。體軟項溫。顏色不變。年七十五。

曹居士

曹居士。不詳其人。持齋念佛。精進有年。而虗懷汲汲。若恐臨終之不獲效者。道光二十年冬。微疾。一日其子晨省。見其面色有異。指空中曰。汝見佛及眾菩薩乎。吾不圖持名功德之至於斯也。汝作證明。吾隨佛西歸矣。言訖而化。

邵媼

邵媼。常熟邵子寅。茂才之母也。素奉佛。道光十八年十二月。微疾。忽謂子寅曰。爾於明日。迎妹歸。子寅從之。而莫測其所謂。

次日。妹歸。媼曰。吾今日欲逝。以了母女因緣耳。女聞而哭。媼 笑曰。死生一幻相也。遂與言他事。至午。曰。時至矣。子寅問何 往。媼以手指空曰。佛來。遂浙。

張氏

張氏。金山縣人。歸王生。其伯姑王氏。修淨業往生。事見淨土聖賢錄續編。張氏自幼即信淨土。為人淡樸。素善病。而念佛不輟。受三歸五戒。不願有家緣。幼已許字。遂於嘉慶二十年于歸。年餘歸甯母氏。適病劇。延道俗行人同聲念佛。亡何。喘急。屬扶起。面西坐。誦彌陀經及佛名。目熒熒上矚。面含笑容。頃之。乃瞑。

丁氏

丁氏。金山人。即張氏姒也。其伯姑王氏。勸之念佛。同日秉受歸戒。王先逝。丁氏見其臨終正念。愈自感奮。剋時課誦。回向西方。居常作諸功德。並戒殺放生。一師王氏遺法。有女適太原。病瘵。教之念佛。安然化去。逾年。丁氏病中滿。轉側維艱。臨終。力疾起。面西坐。呼家人誦彌陀經及佛號。甫百餘聲。觀其若有注視。問見佛菩薩否。首微頷之。頃之聲息俱滅。時在道光八年五月九日。

高士楨

高士楨。字延三。錢唐人。其先世居山陰梅里。故自號梅溪道人。 年五十一。病入冥中。遊視地獄。有冥官屬云。爾今回去。要一心 念佛。一心行善。定能出苦。士楨識之。三日而蘇。病良已。發心 念佛。行諸善法。回向西方。并轉以教人。如是二十五年。至年七 十五。臨終三日前。自知時至。曰。今離苦惱矣。奉勸世人。及早 修持。無詒後悔。泊然而逝。時在乾隆三十五年十二月。

丁世濟

丁世濟。字子沂。元和庠生。年五十。歸依杯渡海公。法名廣如。 精修淨業。歷十載不倦。道光二十五年冬。有疾。每夜必念佛千 聲。彌陀經三卷。發願文一徧。一夕誦至淨光照我之句。忽微笑 曰。我今見佛淨光矣。十一月十三日。夜將半。諸眷屬環坐榻前。 忽聞異香浮空而至。漸滿一室。共異之。次日世濟索筆作偈。禮似 七絕二首。而字迹糢糊。但識其末後句。有我便回家見佛六字而已。至夜合掌。念佛而逝。年六十一。

陸孺人

陸孺人。蘇州人。歸太學生包心愚。事姑孝。嘗侍疾。不解帶者。 累月。心愚故勇於為善。凡造橋修路。施衣放生諸事。恒戚然於 心。孺人必盡力贊成。幼嘗浮海參普陀。中年後。足不踰閾。晨起 誦經呪。及佛號。四十年中。無一日閒。道光二十七年。四月初。 感微疾。告子婦曰。夜夢古衣冠三人相招。謂我念佛。至誠。即日 令我見佛矣。初八日凌晨。西向念佛而逝。年八十五。

邱逢泰

邱逢泰。字星階。長洲廩生。少有咯血疾。其年夏。疾大作。忽信佛乘。延在經茂公。牀前誦佛號。疾有間。杜門不出。徧閱淨土諸書。道光二十九年夏。疾復作。念佛不輟。趺坐合掌而逝。父維洛副貢生。素行善。修淨業。未幾亦念佛而逝。

錢氏

錢氏。名蘭貞。蘇州人。幼即居止端莊。適顧淦為妻。後因懷孕。 遘疾甚危。半體皆冷。神識瞀亂。有至戚省之。勸其夫。立誓戒 殺。誦觀音聖號。從之。三日。汗下。其疾若失。自是錢氏歸心淨 業。每夜焚香。誦大士號。雖嚴寒酷暑勿間也。道光二十八年冬。 染咯血疾。漸增劇。延至二十九年。十月八日。忽曰。苦海茫茫。 三日可出矣。初十日。清晨。令設香案於牀右。曰。今日決定往 矣。口中仍誦大士號。頃之。忽稱阿彌陀佛。至申刻。聲漸微。向 西吉祥而浙。翌日天明。頂相猶溫。年二十九。

錢文彬

錢文彬。字養愚。蘇州長洲縣人。每日晨起。默修十念法。作善事。皆隱行。嘗出千金。放諸魚鳥。素患咯血疾。年四十一。病劇。請在經茂公。歸依。病中喜聽誦佛聲。臨歿前一日。延靈鷲福海和尚至。牀前。供佛設座。受菩薩戒。留僧數人。輪流念佛。次日晡時。亟命扶掖起坐。諦視佛像而逝。時在道光二十八年。二月二十五日。

錢文燦

錢文燦。法名空相。字安軒。即文彬弟也。弱冠時。遇吳宗魏指示淨業。歸依見心和尚。從靈鷲義公受菩薩戒。長齋念佛。二十餘年。嘗刊念佛警策。廣為施送。靈鷲募建丈六三聖像。絀於貲。文燦贊成之。虞山有古剎。亦募建三聖。則獨任之。天台國清寺鑄銅鐘。亦半賴其力也。放生濟貧。歲以為常。道光三十年夏。下痢令人往虞山。延道友張元祺至。曰。吾與君係生死交。病亟矣。請君一助。元祺曰。諾。日與念佛。每昏沈欲睡即策勵之。已而元祺欲返家。文燦曰。吾四日中。可無恙。過此不能待矣。元祺如其言。及四日後復至。則昏沈益甚。元祺以聞啟初傳。與之細論(傳見淨土聖賢錄前編)。文燦涕淚并下。遂猛力念佛。自未至亥。神識頓清。徹夜無倦。天將旦。手作蓮華狀元張。遂右脇而逝。時七月初四日也。遺言喪中不用葷酒。年四十三。

定意

定意。未詳其所出。中歲出家。精持戒律。主錫丹陽嘉山隆慶寺。同治紀元。避地楚水寶嚴。提倡蓮宗。率眾念佛。精純靡間。日誦佛名五萬。淨懺二時。雖寒暑不逾。四眾歸心。咸以嘉山老人尊之。乙丑元日。豫刻逝期。日飲清水兩盞。至初七日平明。禮淨土懺畢。趺跏西向。端坐而逝。隣人聞蓮華香。經時不散。

明舟

明舟。秦郵毛氏子。幼從觀音淨全薙染。年十八。受具臨澤安樂寺。以赴應為業。後遇永清主人。授以淨土法門。遂發心念佛。嗣往來秦塘。日研深義。信心益固。常率眾持名。雖燭跋香銷。猶自哀籲佛前。願速生安樂。利濟有情。故遐邇傾心。雖闡提輩。亦稽首歸依也。同治乙丑三月。返別知交。五月朔示疾。至十二日平明。禮佛入龕。同眾念佛名者。定香四炷。至午聲漸微。視之逝矣。秦郵僻處湖濵。二十年來。蓮宗之振。至家絃戶誦。葢舟有以啟之也。

汪善慶

汪善慶。字閬仙。號法如。淛之仁和人。少孤。隨母氏莊。就傅外家。性至孝。極聰慧。年方舞勺。即入頖宮。及母卒。喪葬盡禮。

聘朱氏未娶。遭粤匪之亂。孑然一身。逃至江北呂泗場。值同里清修之許靈虗者。延為西賓。居恒嘗作出世想。會西來徐居士。授以持誦法門。由是精心內典。一切經義。過目無遺。迨許返淛。移住揚州藏經院。茹素十餘年。每靜坐。寡交遊。凡來問道者。無不傾心開導。體素瘠。經禪勞憊。輙頭眩咳[口*敕]。然猶念佛不懈。同治九年閏月疾篤。聚諸友告曰。西方境界好。吾於二十三日長往矣。至期果逝。神色不變。越日將殮。撫其頂。氣尚溫。時年四十有二。所著藏龍集。見珠集。台宗四教。斷證圖頌。及病中吟百首。行世。

靜波

靜波。草堰場人。年二十。薙染於義阡寺。專心淨土。受戒後。往來常州天寗。揚州高旻藏經等寺。性情淡定。終身無異。兼能念佛不懈。常禮佛七。屏心息慮。人罕能企。嗣往金山。數載樓居。足不踰桄。忽一日沐浴更衣。親詣丈室拜辭。曰。七日後。吾西歸矣。果於同治十三年四月初十日毫無疾苦。念佛趺跏而逝。斯誠無有去住者。年八十有二。

易特墨太夫人

易特墨太夫人。法名蓮如。滿洲正紅旂人。勤儉仁慈。睦族情殷。 惠周婣黨相夫教子。孜孜不倦。故依太守勒通阿札分轉拉芬阿。二 公出仕。卓著政聲。秉母訓也。太夫人。中年茹素。潛心淨業。每 日定課。誦佛號兩萬數。無間寒暑者。二十餘年。光緒元年。壽六 十二歲。忽於冬月望後。神氣不爽。告家人曰。我見佛像數尊。泉 童男女。手執幡幢均來接我。已自定期於二十七日午時。往生西 土。因將存儲衣飾。俵散媳女諸人。竝囑持身處世。俱以方便為 本。餘無他言。屆期趣令闔宅眷屬。環跪誦佛。遂即合掌趺坐。朗 宣佛號而逝。

余慎行

余慎行。法名淨阿。揚州甘泉人。夙精骨董學。遂業以謀生。眷屬 緣盡。孑然獨處。同治乙丑。聞藏經院開念佛道場善知識雲集焉。 聆音仰慕持念茹素。皈依入院。護持道場。以放生物。禮佛七為 事。終歲無惰容。光緒乙亥冬。忽染微疾。念佛倍切。除夕對眾 日。速具香花供佛。吾將逝矣。迨力微細。堅令侍者。臮諸善眾。助念而寂時年六十九歲。

玉峯法師

古崑字玉峯一號戀西。志淨土也。江西廣信人。年十餘齡。投普窜 寺出家。靈根宿具。初讀諸大乘經。即了大意。繼受具戒。於天台 國清。志遵梵網。隨眾參禪。力究宗旨。忽聞鐘聲。恍然有省。後 閱幽溪圓中鈔。密符自心。增益法喜。遂立堅固誓願。嚴持戒律。 一心念佛。求生淨土。自行化他。惟誠惟懇。僧俗從而化者甚眾。 開示後學生死之苦。其言痛切。聞者流淚。教人念佛。日有定課。 持名計數。或一萬二萬。乃至十萬。隨人心力。中無間斷。畢命為 期。如此不退。命終之後定生淨土。此是前人已驗之法。可信無 疑。又復著書多種。闡揚淨十法門。易行易成。功超眾行。若肯遵 行。決不相賺。仍復刊印大乘經律。石刻彌陀寶典。流通正法。用 報佛恩。及餘種種勝行。難以盡述。光緒十五年。明州西方寺僧淨 果。請居西方寺。以寺名合於本願。遂定居焉。師自發心直至臨 終。日持佛名六萬。二時回向。寒暑無間。永為定課。光緒十八 年。七月初六。午飯後覺腹微脹。次日淨果延醫診視。醫云脈已全 無。不須用藥。而師面西趺坐念佛。並無他語。精神爽健。過於平 時。醫生歎為希有。淨果云。請眾師念佛相助可否。師應諾。於是 請僧八人。向西長跪。稱念彌陀聖號。約一枝香。甫至申刻。見師 合掌。猛力念佛數百聲。怡然而敘。初九日入龕。面色津潤。頂上 猶溫。次年二月望日茶毗。僧俗送者數百人。火既發龕門先脫。見 師趺坐儼然如牛。猛燄既熾。眾見頂上現佛十尊。兩手各現佛像一 尊。葢師生前。嘗於頂上燃香十炷。供養十方諸佛。兩手各燃一 指。一供釋尊。一供彌陀。故於闍維之際。頂手現佛。實為真誠所 致。希有之瑞。於戲牛為淨土領袖。歿後勝品往牛。無可疑者。前 有沈朱吳三太史。就師問道。極讚師之道行。實為末世津梁云云。

願登師

思岸字願登。杭州錢塘謝氏子。少業儒為諸生。覺世無常。皈心三寶。宗教知識參扣略編。後聽玉峯法師開示。欲求脫苦。惟有念佛一法。最易成就。遂乃發心日持佛名六萬為定課。平生所作功德。悉皆回向淨土。同治壬申。受五戒於海潮寺。復深厭塵勞。早求解脫。於光緒九年。乃將家務付囑二子。徑往郡西護國寺。禮僧敬峯出家。是冬受具戒於蕭山祇園寺。仍回護國。專精淨業。積勞既

久。忽染病魔。雖經醫治。旋愈旋發。二子思慕迎養於家。別除一室。以為修淨之所。迨至光緒十五年秋。忽患痢疾。醫藥罔效。然飲食雖減。而念佛愈切。至九月初十日。忽謂其子曰。吾往生期至。可請僧於家。起佛七助我西歸。自定十二日起一。謂僧朗峯曰。還有七日。至十五日。執僧廷山手曰。止有三日。吾當去也。至十七日四更問何時。其子答云。丑時也。曰丑時是十八日。子是我往生之期。可請諸師念佛相助。遂隨眾念佛。約香一枝半。忽瞑目無聲。良久忽開眼合掌。向眾人稱謝云。我已親到西方。親見阿彌陀佛及二大士。仰荷佛慈。賜我淨衣。觀音大士水洒我頂。又見蓮池大師。為眾說法。又覩七寶池中。眾寶蓮中有我生處。承佛慈悲。命我回來告知眾人。我已得生淨土。奉勸諸位。專精念佛。他日淨土相見可也。復索淨水三飲。吉祥而臥。念佛數十聲。泊然長往。次日入棺。頂猶溫手。

杭城數十年來。專勤念佛。往生淨土者。固不乏人。昭明顯著。徵 信無疑。惟願登師一人而已。於戲若非夙具靈根。焉能有如是哉。 書此以為修淨業者勸。

謝春華

謝春華。杭州錢塘人。習曹衣業。稟性和首。與人無爭。事親至 孝。未嘗忤顏。凡遇善舉。竭力相助。所謂茹素念佛。則未能行。 光緒十年忽染蟲脹之疾。醫禱無效。呻吟待盡而已。有表弟朱居士 金伯者。久親佛法。參叩知識。禪宗旨趣。多所發明。一日來謂春 華曰。觀兄所患病苦。實是宿世業障。若不立大善願。念佛懺悔。 恐難消除。春華首肯。遂立願。終身戒殺放生。志心念佛。既立願 己。朱居士教之。共念阿彌陀佛四十九日為期。是晚夢僧與一藥九 令吞之。既寤覺腹中響動。連下數次。當即身安。不三日病盡痊 愈。自此信心懇切。念佛靡間。凡有佛會。無不身預。迨至光緒十 五年。夏初偶染微疾。飲食少進。而念佛益切。至四月二十六日。 夢中親見西方三聖。知是往生之兆。遍告親友。將生淨土。謂姚居 士明齋云。二十八日。我當西去。可來念佛相助。曰二十八日不暇 不能來。又云二十九可否。曰二十九亦不暇。復云若如此。定於五 月初一去如何。日初一當來送行可也。至期澡沐更衣。面西端坐。 謂諸子曰。汝等若有孝心者。念佛助我。慎勿哭泣。既而善友俱 集。同稱佛號約半枝香。舉手合掌。謝眾助道。仰目視空。若有所 見。合掌向空。含笑而逝。歿後眾聞異香。數日不散。實為希有者 H1, 0

種蓮集(終)

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦, 並成立「財團法人西蓮教育基金會」— CBETA 專戶, 所有捐款至 CBETA 專戶皆為專款專用, 歡迎各界捐款贊助。

您的捐款本協會皆會開立收據, 此收據可在年度中申報個人或企業的綜合所得稅減免。 感恩諸位大德的善心善行, 以及您為佛典電子化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後, 請傳真至 02-2383-0649, 並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號: 19538811

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".